


冊府元龜

二百十五之十七

六十五



漢書門類			
五三四九	函號	二〇〇一	冊架

內閣文庫		
五三四九	函號	三〇〇九
漢書	冊架	三六五

內閣文庫		
番號	漢	5345
冊數	300	(65)
函號	365	6



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



冊府元龜

淺草文庫

淮南李嗣京參閱

西極文翔鳳訂正

豫章黃國琦較釋

閏位部 三十四

招懷 和好 却貢獻

招懷

傳曰招攜以禮懷遠以德是知有國者務輯寧於初
附將誘致於來者而外示其優禮而內彰乎大度俾
危疑者得自安之地翔引者無失所之嗟誠接物之

閏位部

宏猷經遠之大略也自漢氏之末羣雄並起玄德奮
於庸蜀孫氏據有江東其餘趙趙陸梁往往而在莫
不懷去就之分審廢興之命跨州連郡以待所歸於
是折珪以慰其心遣使以達其意或委質以從命或
脩貢以稱藩故能撫有其民人恢拓乎疆宇聘峙之
業雄視二隅繇宋齊以還南北分壤逮夫高齊至於
梁氏疆場之事一彼一此反側之子改過自新咸用
接納存卹俾其安集斯誠君國者之永圖哉
蜀先主初圍劉璋於成都時偏將軍馬超領其父騰
部曲依張魯魯不與計事內懷於邑密書請降先主

遣人迎超超將兵徑到城下城中震怖璋卽稽首

又云

先主使李恢至廣中
交好馬超超遂從命

黃權爲劉璋廣漢長及先主襲取益州將帥下郡縣
郡縣望風景附權閉城堅守劉璋稽服而詣降先主
假權偏將軍

吳大帝初爲吳侯建安十五年遣步騭爲交州刺史
時士奕爲綏南中郎將董督七郡領交阯太守騭到
燮率兄弟奉承節度帝加燮爲左將軍建安末年燮
遣子厥入質帝以爲武昌太守諸子在南者皆拜中
郎將又誘導益州豪姓雍門等率郡人民使遙東附

帝益嘉之遷衛將軍弟合浦太守壹時貢馬凡數百疋帝輒爲書厚加寵賜以答慰之

嘉禾元年十月魏遼東太守公孫淵遣較尉宿舒閻中令孫綜稱藩於大帝并獻貂馬帝大悅加淵爵位二年春正月詔以幽青二州十七郡七十縣封爲燕王

宋高祖初爲晉太尉垣遵與其弟苗並爲南燕慕容超委任遵爲尚書苗爲京兆太守帝圍廣固遵苗踰城歸降並以爲太尉行叅軍

孝武大明中懸歛二縣奪亡命數千人攻破縣邑殺

害官長豫章王子尚爲揚州刺史在會稽遣主帥領三千人水陸討伐再往失利帝遣殿中待御史吳喜數十人至二縣誘說群賊賊卽日歸降

明帝卽位初南雍州刺史袁顛與晉安王子勛同反帝使朝士遺顛書曰夫夷陂相因興革遞數或多難而固其國或殷憂而啓聖明此旣著於前史亦彰於聞見王室不造昏凶肆虐神鼎將淪宗稷幾泯幸天未亡宋乾曆有歸主上体自聖文繼明作睿而辱均牖里屯喻夏臺旣天地俱憤義勇同奮克殄鯨鯢三靈更造應天順民爰集寶命四海屬息肩之歡庶民

見來蘇之泰吾等獲免刀鋸僅全首領復身奉惟新
命承亨運緩帶談笑擊壤聖世汝雖劬勞于外迹阻
京師然心期所寄江漢何遠自九江告變皆歸鄧氏
狂惑此日國言藉藉頗塵吾于道路之議豈其或然
聞此之日能無駭惋凶人反道敗德日夜滋深昵近
狡慝取謀豹虎非惟毒流外物惡積中朝乃欲毀陵
邑雪崇憲燒宗廟鹵御物然後蕩覆京都必使蘭蕕
俱盡自非聖上廟筭靈圖俛首遜避維持內外權衡
臣下則赤縣爲戎百姓其魚矣此之事理寧可熟念
旣天道輔順百姓謳歌有奉高祖之孫文皇之子德

同九幽功貫三曜輔拯安國提毓黔首若不子民南
面將使神器何歸而羣小構慝妄懷窺覲成軫惑燕
貫高亂趙讒人罔極自古有之汝京中寇冕儒雅世
襲多見前載縣鑒忠邪何遠遺郎中之清軌近忘太
尉之純槩相與或羣從舅甥或姻婭同欵一旦胡越
能無悵恨若疑誑所至邪詖無窮汝當誓衆奮戈翦
此朝食若自延過聽迷塗未遠聖上臨物以仁接下
以愛豈直計窘跡屈丹誠未亮邪跂予南服寤寐延
首若反擢汨流歸誠鳳闕錫珪開寓非爾而誰吾等
並過荷曲慈俱叨非服紆金拖玉改觀蓬門入奉舜

禹之渥出見義唐之化雍容揄揚信白駒空谷之時也奈何毀擲先基自蹈凶戾山門蕭瑟松庭誰歸言念楚路豈不思父母之邦幸納惡石以蠲美疹裁書表意爾其圖之時尚書右僕射蔡興宗是顓舅領軍將軍表粲是顓從父弟故書云羣從舅甥也後又使覬舊門生徐碩奉手詔譬顓曰卿歷觀古今險之與強何嘗可恃自朕踐祚塗路梗塞卿先繇奉表未經爲臣今追蹤竇融猶未爲晚也

沈文秀爲青州刺史與晉安王子勛同反泰始二年八月子勛平帝遣文秀弟文炳詔文秀曰皇帝問前督青州徐州之東莞東安二郡諸軍事建威將軍青州刺史朕去歲撥亂功振普天於卿一日特有殊澤卿等延命至今誰之力邪何故背國負恩遠同逆豎今天下已定四海寧一卿獨守窮城何所歸奉且卿百口在都兼有墳墓想情非木石猶或顧懷故指遣文炳具相宣示凡諸逆節親爲戎首一不加罪文炳所具卿獨何人而能自立便可速率部曲同到軍門別詔有司一無所問如其不爾人有常刑非唯戮及弟息亦當夷卿墳墓既以謝齊土百姓亦以勞將士之心故有今詔三年二月文秀歸命請罪卽安本任

崔道固爲二州刺史與沈文秀同逆會四方平定明
帝遣使宣慰道固奉詔歸順

殷琰爲建武將軍豫州刺史亦同子勛反叛其將留
胡敗走尋陽平定明帝遣琰參軍杜叔寶之從父弟
季文至琰城下與叔寶語說四方已定勸令時降叔
寶曰我乃信汝恐爲人所言耳叔寶閉絕子勛敗問
有傳者卽殺之時琰子邈東征京邑擊建康帝送邈
與琰令說南賊已平之間自建康出便防送就道議
者以爲宜聽邈與伯父瑗私相見不爾無以解城內
之惑不從邈至叔寶等果疑守備方固後帝以南賊

降者送琰城下令與城內交言繇是人情沮喪琰遂
降

韋珍奇爲汝南郡司馬同殷琰反琰降珍奇據城招
魏留勛與珍奇書勸令反魏珍奇乃與子超越羽林
監垣式寶於譙殺魏子都贊拔等凡三千餘人勛馳
驛以聞明帝大喜以珍奇爲使持節都督司北豫二
州諸軍事平北將軍司州刺史汝南新蔡縣侯食邑
千戶

蕭惠開爲平西將軍都督益寧二州晉安王子勛反
惠開乃集將佐謂之曰湘東太祖之昭晉安世祖之

穆其於當壁並無不可但景和雖昏本是世祖之嗣不任社稷其次猶多吾奉武文之靈兼荷世祖之眷今便當投袂萬里推奉九江乃遣巴郡太守費欣壽領二千人東下爲巴東人任叔兒起義所邀欣壽敗沒峽口道不復通更遣州治中程法度領三千人步出梁州又爲氐賊楊僧嗣所斷先是惠開爲治多任刑誅蜀士咸懷猜怨及聞欣壽没法度又不得前晉原一郡遂反於是諸郡悉用之並來圍城城內東兵不過二千凡蜀人惠開疑之皆悉出之子勛尋平蜀人並欲屠城以望厚賞惠開每遣軍出戰未嘗不捷

前後所摧破傷不可勝計外衆逾合勝兵者十餘萬人時天下已平明帝以蜀土險遠赦其誅責遣惠開之弟惠基步道使蜀具宣朝旨惠基旣至涪而蜀人志在克城不使王命得達遏留惠基不聽進惠基率部曲破其渠帥馬興日等然後得前惠開奉旨歸順城圍得解及還都明帝待之益厚時帝遣惠開宗人寶首水路慰勞益州寶首欲以平蜀爲功更獎說蜀人於是處處蜂起凡諸離散者一時還合渠帥趙燕句文章等與寶首屯軍於上去成都六十里衆號二十萬惠開欲遣擊之將佐咸曰攻破蜀賊誠不爲難

但慰勞使至未獲奉受而遣兵相距何以自明本心
惠開曰今水陸四斷表啓路絕寶首或相誣謂我不
奉朝旨我之欲戰本在通使若得通則誠心達矣乃
作啓事具陳事情使腹心二人帶啓戒之曰湏賊破
路開使躍馬馳出遣永寧太守蕭惠訓別駕費欣業
分兵並進與戰大破之生擒寶首囚於成都縣獄遣
使至帝令執送寶首除惠開晉平王長史南郡太守
後廢帝元徽中遣武衛將軍王世武使河南是歲隨
拾寅使來獻詔答曰皇帝敬聞使持節散騎常侍都
督西秦河沙三州諸軍事車騎大將軍開府儀同三

司領護羗較尉西秦河二州刺史新除驃騎大將軍
河南三寶命革授爰集朕躬猥當大業祗惕兼懷憂
中增感王世武至德元徽五年五月二十一日表聞
之涇熱想比平安又卿乃誠遙著保寶遐疆命詔升
徽號以酬忠款遣王世武銜命拜授又仍使王世武
等往芮芮想卽資遣使得時達又奏所上馬等物悉
至今往別牒錦綿紫碧綠黃青等各十足

南齊太祖建元元年詔曰交趾北景獨隔書朔斯乃
前運方季負海不朝因迷往昔歸款莫繇曲赦交州
部李叔獻一人卽撫南土文武詳才選用并遣大使

宣揚朝恩以試守武平太守行交州府事李叔獻為
交州刺史

東昏侯永元三年後魏東徐州刺史沈陵降以為北
徐州刺史

梁高祖天監十三年後魏太嘗博士崔靈恩歸國高
祖以其儒術擢拜員外散騎嘗侍

元願達魏支庶也天監中為後魏司州刺史因大軍
北伐攻義陽願達舉州獻款詔封樂平公侍中

王神念太原郡人天監中以後魏潁川守據郡歸款
封南城侯青冀二州刺史

元法僧為後魏鎮東將軍徐州刺史普通六年以彭

城內附授司空封始安王法僧魏氏支屬鎮彭城是
時魏室亂遂據鎮稱帝魏討之乃歸款請為附庸高

祖遣奉朝請陳慶之與胡龍牙成景雋率諸軍應接
及還朝甚加優寵時方事招携賜法僧甲第女樂金

帛遷太尉

元樹字君立後魏近屬也仕魏為宗正卿爾朱榮亂
歸國封為鄴王鎮北將軍

羊侃為魏征東大將軍大通三年歸國詔授安北將
軍徐州刺史并其兄默及三弟悅元皆拜為刺史

胡僧祐爲魏銀青光祿大夫大通三年避爾朱氏之難南歸頻上封事武帝器之拜主帥使之送魏北海王元顥入雒陽僧祐又南歸除南天水天門二郡太守
侯景爲魏司徒太清元年求以豫廣潁雒陽西揚東荆北荆襄東豫南兗齊等十三州內屬高祖以景爲大將軍封南河王大行臺承制如鄧屬故事遣同州刺史羊鴉仁兗州刺史桓和仁州刺史湛海珍等應接之

孝元帝時湘州刺史王琳以平侯景之勲第一縱暴

於建業王僧辯啓請誅之琳令長史陸納率部曲前赴湘州身輕上江陵陳謝帝以琳下吏使廷尉卿黃羅漢大舟卿張載宣喻琳軍納等及軍人繫羅漢殺載帝遣僧辯討納是時湘州未平武陵王兵下又甚盛江陵公私恐懼人有異圖納啓申琳無罪請復本位求爲奴婢帝乃鎖琳送僧辯時納出兵方戰會琳至僧辯升樓車以示之納等投戈俱拜舉軍皆哭曰乞王郎入城卽出放琳入納等乃降湘州平仍復琳本位

陳高祖永定元年以晉安太守陳寶應爲持節散騎

嘗侍信武將軍門州刺史領會稽太守竇應梁末爲
晉安太守時東西嶺路寇賊擁隔竇應自海道趨于
會稽貢獻故有是命
二年三月梁湘州刺史王琳立永嘉王蕭莊于郢州
六月詔侯瑱討之又遣吏部尚書謝哲諭琳琳請還
鎮湘州詔追衆軍緩其伐
魯悉達梁末以侯景之亂糾率鄉人保新蔡及晉熙
等五郡及王琳據有上流琳授悉達鎮北將軍高祖
等遣趙知禮授征西將軍江州刺史各送鼓吹女樂
悉達兩受之遷延顧望皆不欲降高祖遣安西將軍

沈泰潛師襲之不能克齊齊遣行臺慕容紹宗以衆
三萬來攻鬱口諸鎮兵甲甚盛悉達與戰敗齊軍紹
宗僅以身免王琳欲圖東下以悉達制其中流恐爲
已患頗遣使招誘悉達終不從琳不得下乃速擊於
齊共爲表裏齊遣清河王高岳助之相持歲餘會禪
將梅天養等懼罪乃引齊軍入城悉達勒麾下數千
人濟江而歸高祖高祖見之甚喜曰來何遲也悉達
對曰臣鎮撫下流願爲藩屏陛下授臣以官恩至厚
矣沈泰襲臣威以深矣然臣所以自歸於陛下者以
陛下豁達大度同符漢祖故也高祖笑曰卿言得之

矣授平南將軍散騎嘗侍北江州刺史封彭澤縣侯
宣帝大建十二年八月周使持節上柱國邛州總管
榮陽郡公司馬消難以鄖隨溫應士沔儂岳等九州
魯山醜山沌陽應城平靖武陽上明涇水等八鎮內
附詔以消難爲使持節侍中大都督總督安隨等九
州八鎮諸軍事車騎將軍司空封隨郡公給鼓吹女
樂各一部

東魏孝靜帝興和二年五月西魏行臺宮延和峽州
刺史元慶率戶內屬置之河北新附賑廩各有差
武定七年正月梁北徐州刺史湘山侯蕭正表以鎮

內附封蘭陵郡公吳郡王

北齊神武爲東魏大將軍爾朱榮都督濟州刺史張
瓊因爾朱兆敗歸神武用爲汾州刺史

堯雄初仕後魏爲燕州刺史隨爾朱兆敗於廣阿遂
率所部據定州以歸神武時雄從兄傑爾朱兆用爲
滄州刺史至瀛州知兆敗亦遣使歸降神武以其兄
弟俱有誠款便留傑行瀛州事尋以雄爲車騎大將
軍瀛州刺史以代傑

王則初隸爾朱仲遠爲征虜將軍仲遠敗始歸神武
加征南將軍金紫光祿大夫

慕容紹宗初爲爾朱兆長史神武從鄴討兆於晉陽兆窘急走赤衿嶺自縊而死紹宗行到馬突城見神武追至遂攜榮妻子及兆餘衆自歸神武仍加恩禮所有官爵竝如故軍謀兵畧時參預焉

可朱渾元後魏末爲渭州刺史侯莫陳悅之殺賀拔兵也周文帝率賀拔岳所部還共圖悅元時助悅走元收其歸衆入據秦州爲周攻圍苦戰結盟而罷元旣早爲神武知遇兼其母兄在東嘗有思歸之志嘗遣表疏與神武陰相往來周文攻圍忌元智勇知元懷貳發兵攻之元乃率所部發自渭州西北烏蘭津

周文頻遣兵邀元之戰必催之引軍歷河源二州境乃得東出靈州刺史曹湜女壻劉豐與元深相交結元因說豐以神武英武非嘗克成大業豐自此便有委質之心遂資遣元從靈州東北入雲州神武聞其來也遣平陽守高嵩持環一枚以賜元并運資糧遠遣侯接元至晉陽引見執手賜帛千匹并奴婢田宅兄弟四人先在并州者進官爵元所部督將皆賞以爵邑封元縣公除車騎大將軍任延敬廣寧人初從葛榮爲賊榮署爲王甚見委任榮敗延敬擁所部先降拜鎮遠將軍廣寧太守

文襄初爲魏大將軍封渤海王時侯景據河南反令韓軌等討之不克議者咸云侯景猶有北望之心但信命不至耳又景將蔡遵道北歸稱景有悔過之心王以爲信然謂可誘而致乃遣景書曰先王與司徒契濶夷險孤子相依偏所眷屬義貫終始情存歲寒目爲國士者乃立漆身之節饋以一餐者便致扶輪之效况其重於此乎嘗以故舊之義欲將子孫相託方爲秦晉之匹共成劉范之親况聞負杖行歌便以狼顧反噬不蹈忠臣之路乃陷叛人之地力不足以自強勢不足以自保率烏合之衆爲累卵之危西

取救於宇文南請援於蕭氏以狐疑之心爲首鼠之事入秦則秦人不容歸吳則吳人不信當是不逞之人曲爲無端之說遂懷市虎之疑乃致投杼之感昔來舉止事已可見人相疑誤想自覺知闔門大小悉在司寇意謂李氏未滅猶言少卿可扶孤子無狀招禍丁天酷罰但禮繇權奪志在忘私聊遣偏裨前驅致討南兗楊州應時克復卽欲乘機席卷縣歙屬以炎暑欲爲後圖且令還師待時更舉今寒膠向折白露將團方憑國靈龔行天罰器械精新士馬強盛內外感恩上下戮力三令五申可赴湯火使旗鼓相望

埃塵相接勢如渥雪事等注螢夫明者去危就安智者轉禍為福寧人負我我不負人當開從善之徒使有改迷之路若能卷甲來朝垂橐還闕者當即相授豫州必使終君身世所部文武更不追攝進得保其祿位退則不喪功名今王思政等皆孤單徧將遠來深入然其性命若在掌握脫能刺之想有餘力即相加授永保疆場君門眷屬可以無恙寵妻愛子亦送相還仍為通家共成親好君今不能東封函谷南面稱孤授制於人威名頓盡得地不欲自守聚眾不以為強空使身有背叛之名家有惡逆之禍覆宗絕嗣

自貽伊戚戴天履地能無愧乎孤子今日不應遣此但見蔡遵道云司徒本無西歸之心深有悔過之意

不知此語為虛為實吉凶之理想自圖之

景報書曰僕鄉曲布

衣本乘藝用出身為國綿歷一紀犯危履難豈避艱霜遂得富貴當年榮華身世一旦舉旗旆授鼓袍此面相抗者何哉實以畏懼危亡恐招禍害故耳往年之暮尊王構疾神不祐善祈禱莫瘳遂使嬖倖弄權心腹離二妻子在宅無事見圍及迴歸長社希自陳狀簡書未遣鉄鉞已臨既旌旗相對咫尺不遠飛書每奏冀申鄙情而羣帥持雄耿然弗顧運戟摧鋒專欲屠滅掘圍偃水僅存三版舉目相看命懸漏刻不忍死亡出戰城下向奉送地豈樂為之但禽獸惡死人倫好生僕實不幸桓莊何罪且尊王平昔見於此肩戮力同心共獎帝室雖復權勢參差寒暑八禩丞相司徒雁行而已福祿有榮自是天爵勞而復授理不相于欲求吞炭何其謬也然竊人之財猶謂之盜祿去公室抑謂不取今魏德雖衰天命未改拜思私

第何足閑言暢喧不能東封函谷授制於人當以教
 僕賢蔡仲而哀季氏無主之國在禮未聞動而不法
 將何以訓竊以分財養幼事歸令格舍定存孤誰云
 隙末復聞聚眾不足以自強身之陷危如累卵案億
 兆夷人卒降十罰紂之百克終自無後穎川之戰即
 是殷鑒輕重繇人非鼎在德苟能忠信雖弱必強殷
 憂啓聖處危何若况今梁道邕熙招携以禮被我虎
 文縻之好爵方欲死五岳而池四海掃氛穢以拯黎
 元東霸既越西通汧隴吳越悍勁帶甲千羣秦兵冀
 馬控弦十萬大風一捲枯幹必摧凝霜暫落秋帶自
 殞此而為弱誰足稱雄又見誣兩端受疑二國斟酌
 物情一何太甚昔陳平背楚歸漢則強百里出虞人
 秦斯霸皆昏明繇主用舍在人奉禮而行神其吐邪
 言稱士馬精心尅日齊舉誇張形勢必欲傾滅切以
 寒膠白露節候乃同秋風揚塵馬首何異徒知北方
 之力爭未識南面之合從苟欲徇意于前途不覺境
 守在其側去危就安今歸正朔轉禍為福已脫網羅
 彼常強僕之愚迷此亦笑君之晦昧今引二邦揚旌
 北討熊虎齊奮克復中原荆襄廣穎已屬閩春源賊
 縣張亦奉江南幸自取之何勞見接然權變非一理

有萬塗為君計者莫若割地而和三分鼎峙燕魏趙
 晉足相俸祿齊曹宋魯悉歸大梁使僕得輸力南朝
 北敦姻好束帛自行戎車不假僕立當世之功君卒
 父禰之業各保疆壘聘享歲時百姓又寧四方安堵
 執若驅農夫於隴畝抗勅敵於三方避干戈於首尾
 當鋒鏑於心腹縱太公為將不能獲存歸之高明何
 以克濟來書曰妻子老幼悉在司寇以此見要庶其
 可反當是見疑偏心未說昔王陵附漢母在不歸太
 公囚楚乞羹自若矧伊妻子而可介意脫謂誅之有
 益欲止之不能殺之無損徒復阮戮家累在君何關
 僕也而遵道所說頗亦非虛赦重陳辭更諭款曲所
 望良圖時惠報旨然昔與盟主事等琴瑟讒人間之
 翻為仇敵撫弦擣矢不覺
 傷懷裂帛還書知何能述

文宣帝天保六年梁司徒都督郢州刺史陸法和舉
 州來降帝以法和為大都督十州諸軍事太尉公以
 西南都督五州諸軍事荊州刺史安湘郡公宋莅為

郢州刺史義興縣公梁將造爲散騎嘗侍儀同三司
湘州刺史義興縣公梁將侯瑱來逼江夏齊軍棄城
而退法和與宋莅兄弟入朝帝問其奇術虛心相見
之備三公鹵簿於城南十三里供帳以待之法和遙
見鄴城下馬禹步卒術謂曰公旣萬里歸城主上虛
心相待何作此術法和手持香爐步從路車至於館
明日引見給通幟油絡網車伏身百人詣闕通名不
稱官爵不稱臣但云荊州刺史文宣宴法和及其徒
屬於昭陽殿賜法和錢百萬物千段甲第一區田一
百頃奴婢二百人人生資什物稱是宋莅千段其餘儀

同刺史以下各差等

梁太祖開平二年九月帝西幸至於陝幽州都將康
君紹等十人自蕃賊寨內來投又幽州騎將高彥章
八十人騎先在并州乃於晉州軍前來降至是到行
在皆賜分物衣服放歸本道以示懷服

三年二月同州節度使劉知俊奏延州都指揮使高
萬興部領節級家累三十八人來降三月以萬興簡
較司徒爲丹延等州安撫招誘等使又八月制左憑
背叛元惡遁逃如聞相濟之徒多是脅從之輩若能
迴心向國轉禍全身當與加恩必不問罪仍令同華

雍等州切加招諭如能梟斬溫韜或以鎮寨歸化必加厚賞仍獎官班兼委本界招復人戶切加安存
閏八月襄陽叛將李供差小將進表帝示以舍弘特賜勅書慰諭

四年二月賜潞州投歸軍馬張行恭錦服銀帶并食
五年二月武安軍節度使馬殷進呈虔州刺史盧延昌牋表虔州北支郡也兵甚銳自得韶州益強大昇為百勝軍使始洪州之陷盧光稠願收復使府立功自効上因兼授江西觀察留後光稠卒復命延昌領州事方伯亦頗慰薦揚渭遣人為暑爵秩延昌佯受官牒禮遣其使因胡南自表其事曰郡小寇迫欲殺其姦謀且開導貢路非敢貳也以其為制來自陳上覽奏曰我方有北事不可不爾甚加撫卹尋兼授鎮南將軍節度使觀察留後命使慰勞

乾化元年六月乙卯命北面都招討使鎮國軍節度使楊師厚出屯邢維丁巳鎮定鈇我蕩陰詔曰嘗山背義易水傲尤誘其蕃戎動我邊鄙南侵相魏東出邢維是用遣將徂征為人除害但初頒赦令不欲食言宥而伐之諒非獲已况聞謀始不自帥臣致此厲階並錄姦佞密通人使潛結犬戎既懼罪誅乃生離

叛今雖行討伐已舉師徒亦開詔諭之門不阻歸降之路矧又王鎔處置未曾削爵除名若翻然改圖不遠而復必仍舊貫當保前功如有率眾向明拔州效順亦行殊賞冀徇來情免令受弊於疲民用示惟新於汚俗宜令行營都招討使及陳暉軍前准此勅文散加招諭將安眾懼特舉明恩鎮州只罪李弘規一人其餘一切不問

末帝貞明元年三月邠州留後李保衡以城歸順保衡楊崇本養子崇本又李茂貞養子任邠州二十餘年去歲為其子彥魯所毒彥魯權知州事五十餘日保衡殺彥魯送款於帝即以保衡為華州節度使以河陽留後霍彥威為邠州節度使


和好

自三代之季天統棄絕皇綱不振豪傑並立干矛日熾禹迹幅裂互專我疆桀犬晝吠各是其主勢未服德民思息肩則必奉春秋之盟以修隣好達往來之使申其聘禮用和為貴無言不酌惠養疲疇保守封略力穡以茲其調度通商以便其有無至於天災流行交相救卹顧謀靈命質諸鬼神蓋以隨時之大義弭兵之良術也

蜀先主之得成都也吳孫權使使報欲得荊州先主
 言須得涼州當以荊州相與權忿之乃遣呂蒙襲長
 沙零陵桂陽三郡先主引兵五萬下公安令關羽入
 益陽會曹公定漢中張魯遁走巴西先主聞之與權
 連和分荊州江夏長沙桂陽東屬南郡零陸武陵西
 屬引兵還江州權使大中大夫鄭泉來聘因謂其羣
 臣曰近得玄德書玄德先主字已深引咎求復舊好前所
 以名西為蜀者以漢帝尚存故耳今漢已廢自可名
 為漢中王也

章武二年先主侵吳為吳所敗先主駐白帝大帝甚
 懼遣使請和先主許之遣大中大夫宗瑋報命
 後王建興元年吳遣信都尉馮熙來聘且弔喪也是
 歲南中諸郡並皆叛亂丞相諸葛亮以新遭大喪故
 未便加兵遣尚書郎鄧芝固好於吳致馬二百匹錦
 千段及方物

二年夏吳遣輔義中郎將張溫來聘亦致方土所出
 以答厚意遂為與國是年後主又遣鄧芝聘於吳重
 結盟好權謂芝曰山民作亂邊守兵多輒慮曹丕乘
 空弄態而反求和議者以為內有不暇幸來求和於
 我有利宜當與通以自辨定恐西州不能明孤赤心



用致嫌疑孤土地邊外間隙萬端而長江巨海皆當
防守不觀釁而動惟不見便寧得志此復有他圖芝
再使吳帝數與芝相聞饋遺優渥

七年吳大帝稱尊號其羣臣以並尊二帝來告議者
咸以爲交之無益而名躰弗順宜顯名正義絕其盟
好丞相諸葛亮曰吳有僭逆之心久矣國家所以略
其釁情者求犄角之援也今若加顯絕讎我必深更
當移兵東戍與之角力湏并其土乃議中原彼賢才
尚多將相輯睦未可一朝定也頓兵相持坐而湏老
使北賊得計非筭之上者昔孝天子辭匈奴先帝優

與吳盟皆應權通變弘思遠益非丈夫之爲忿者也
今議者咸以權利在鼎足不能并力且志望已滿無
上岸之情推此皆似是而非也何者其智力不侔故
限江自保權之不能越江猶魏賊之不能渡漢非力
有餘而利不取也若大軍致討彼高當分裂其地以
爲後規下當略民廣境示武於內非端坐者也若就
其不動而睦於我我之北伐無東顧之憂河南之衆
不得盡西北之爲利亦已深矣權僭之罪未宜明也
乃遣衛尉陳震慶權正號震到武昌大帝與震升壇
歎盟交分天下以徐豫幽青屬吳并涼冀兖屬漢其

司州之士以函谷關爲界造爲盟曰天降喪亂皇綱
失敘逆臣承釁劫奪國柄始於董卓終於曹操窮凶
極惡以覆四海至今九州幅裂普天無統民神痛怨
靡所戾止及操子丕桀逆遺醜荐作姦回偷取天位
而叡么膺尋丕凶蹟阻兵盜土未伏厥誅昔共工亂
象而高辛行師三苗干度而虞舜征焉今日滅叡禽
其徒黨非漢與吳將復誰在夫討惡翦暴必聲其罪
宜先分裂奪其土地使士民之心各知所歸是以春
秋晉侯伐衛先分其田以畀宋人斯其義也且古建
大事必先盟誓故在周禮有司盟之官尚書有告誓

之文漢之與吳雖信繇中然分土裂境宜有盟約諸
葛亮丞相德威遠著翼戴本國典戎在外信感陰陽
誠動天地重復結盟廣誠約誓使東西士民咸共聞
如故立壇殺牲昭告神明再歆加書副之天府天高
聽下靈威斐謀司慎司盟羣臣羣祀莫不臨之自今
日漢吳旣盟之後戮力一心同討魏賊救危卹患分
災共慶好惡齊之無或携貳若有害漢則吳伐之若
有害吳則漢伐之各守分土無相侵犯傳之後葉克
終若始凡百之約皆如載書信言不豔實居于好有
渝此盟創禍先亂違貳不協悞慢天命明神上帝是

討是督山川百神是糾是殛俾墜其師無克祚國于自大吳神明鑒之是歲吳黃龍元年也

吳大帝初爲吳王黃武元年以使聘魏具破蜀軍獲印綬及首級所得土地并表將吏功勤宜加爵賞之恩文帝報使致鸚子裘明光鎧駢馬又以素書所作典論及詩賦與權詔曰老虜邊窟越險深入曠日持久內迫罷弊外困智力故見身於雞頭分兵擬西陵其計不過謂可轉足前迹以搖動江東根未著地摧折其支雖未剗備五臟使身首分離其所降誅亦足使虜部衆兇懼昔吳漢先燒荆門後廢夷陵而子陽

無所逃其死來歎始襲略陽文叔喜之而知隗囂無所施其巧今討北虜正似其事將軍勉建方略務全獨克

景帝永安六年十月蜀以伐魏來告使大將軍丁奉督諸軍向魏壽春將軍留平別詣施績於南郡議兵所向將軍丁封孫異如沔中皆救蜀蜀主降魏問至然後罷

晉主元興元年晉司馬昭爲魏相國遣昔吳壽春城降將相國參軍徐紹散騎嘗侍水曹屬孫或齎書喻皓以平蜀之事致馬錦等物以示威懷書曰聖人稱

有君臣然後有上下禮義是故大必事小小必事大
然後上下安服羣生獲所逮至未塗純德既毀勦民
之命以爭強於天下違禮順之至理則仁者弗錄也
方今主上聖明覆燾無外僕備位宰輔屬當國重唯
華夏垂殊方隅圯裂六十餘載金革亟動無年不戰
暴骸喪元困悴罔定每用悼心坐以待旦將欲止戈
興仁爲百姓請命故分命偏師平定蜀漢役未經年
全軍獨克于時猛將謀夫朝臣庶士咸以奉天時之
宜就旣征之軍籍吞敵之勢宜遂回旗東指以臨吳
境舟師汎江順流而下陸軍南轅徑取四郡兼成都

之械漕巴漢之粟然後以中軍整旅三方雲會未及
浹辰可使江表底平南夏順軌然國朝深惟伐蜀之
舉雖有靜難之功亦悼蜀民獨罹其害戰於綿竹者
自元帥以下並受斬戮伏尸蔽地血流丹野一之於
前猶追恨不忍况重之於後乎是故旋師案甲思與
南邦共全百姓之命夫料力付勢度資量險遠考古
昔廢興之理近鑒西蜀安危之效隆德保祚去危卽
順屈已以寧四海者仁哲之高致也履危偷安隕德
覆祚而不稱於後世者非智者之所居今朝廷徐紹
孫或獻書喻懷若書御於前必少留意回慮革筭結

歡弭兵共為一家惠矜吳會於及中土豈不泰哉此
 昭心之大願也敢不承受若不獲命則普天率土期
 於大同雖重干戈固不獲已也
 甘露元年三月皓遣使隨紹或報書曰知以高世之
 才處宰輔之任漸導之功勤亦至矣孤以不德階承
 統緒思與賢良共濟世道而以壅隔未有所緣嘉意
 久著深用依依今遣光祿大夫紀陟五官中郎將弘
 璆宣明至德江表傳載皓書兩言白稱各言而不著姓陟璆至雜遇晉王
 相國薨乃遣還平南長史張儼五官中郎將丁忠
 寶鼎元年正月遣太鴻臚張儼五官中郎將丁忠

祭晉王相國

宋高祖大明四年十二月後魏遣通和

明帝太始五年十一月魏人來聘

七年三月魏人來聘

後廢帝元徽元年正月魏人來聘

三年六月魏人來聘

南齊武帝永明元年八月魏人來聘十月使騎將軍

劉纘聘于魏

二年十二月魏人來聘

三年三月使輔國將軍劉纘聘于魏十一月魏人來

聘

四年二月使通直郎裴昭明聘于魏

七年九月魏人來聘十一月詔平南參軍顏明聘于

魏

八年六月魏人來聘

九年正月詔射聲校尉裴昭明聘于魏五月魏人來

聘八月使司徒參軍蕭琛聘于魏十月魏人來聘

十年二月使司徒參軍蕭琛聘于魏

十一年四月魏人來聘

廢帝以永明十一年七月卽位十一月魏人來聘

隆昌元年正月使司徒參軍劉敷聘于魏

海陵王延興元年八月魏人來聘

梁高祖普通七年十月放魏揚州刺史李憲還北

大通二年六月魏臨淮王元或求還本國許之十月

以魏北海王元顥為魏主遣東宮直閣將軍陳慶之

衛送還北魏

中大通元年正月魏汝南王元悅求還本國許之

二年六月遣魏太保汝南王元悅還北為魏王八月

庚戌輿駕幸德陽堂設絲竹會祖送魏主元悅

四年正月以太子左率衛薛法護為平北將軍司州

牧衛送元悅入雒二月以新除太尉元法僧還北為

魏主

大同二年十二月東魏請通和許之

三年七月東魏遣使來聘九月使兼散騎嘗侍張臯

聘于東魏

四年五月東魏遣使來聘七月使兼散騎嘗侍劉孝

儀聘于東魏

五年十一月東魏遣使來聘十二月使兼散騎嘗侍

柳約聘于東魏

六年七月東魏遣使來聘是月遣兼散騎嘗侍陸安

于報聘

七年四月東魏遣使來聘是年遣兼散騎嘗侍明少

遐報聘十一月東魏又遣使來聘是月遣兼散騎嘗

侍來狎報聘

十一年四月東魏遣使來聘

太清元年十二月遣太子舍人元貞還北為東魏王

二年七月使兼散騎嘗侍謝琰聘于東魏結和

元帝太清五年

簡文太寶二年也時帝承制于江陵猶稱太清年號

二月魏遣

使來聘

承聖元年五月魏遣來賀平侯景

冊在元龜

閏位部

卷之三百二十五

敬帝太平元年二月齊人來聘使侍中王廓報聘

二年四月齊遣使請和 太平元年三月後齊軍繼至陳霸先皆大敗之至是通和

陳文帝天嘉二年六月齊人通好

三年四月齊遣使來聘

五年四月周遣使來聘五月周齊並遣使來聘十二

月齊遣使來聘

六年四月 一作六月周遣使來聘十月齊遣使來聘

廢帝天康四月卽位十一月周人來弔國哀

宣帝大建元年五月齊遣使來聘

二年五月齊遣使來弔

三年四月齊遣使來聘五月周遣使來聘

四年八月周遣使來聘

五年五月周遣使來聘

六年正月周遣使來聘

七年八月周遣使來聘

東魏孝靖帝天平四年七月遣使散騎嘗侍李楷使

于梁十二月梁武遣使來

元象元年十月梁武遣使來十二月遣陸操使于梁

興和元年六月梁武遣使來八月遣兼散騎嘗侍王

元景使于梁



二年三月梁武遣使來五月遣兼散騎嘗侍李象使于梁十月梁武遣使來十二月遣兼散騎嘗侍崔謙使于梁

三年六月梁武遣使來八月遣兼散騎嘗侍李騫使于梁

四年正月梁武遣使來四月遣散騎嘗侍李繪使于梁十月梁武遣使來十二月遣兼散騎嘗侍楊裴使于梁

武定元年六月梁武遣使來八月遣兼散騎嘗侍李渾使于梁

二年三月梁武遣使來五月遣兼散騎嘗侍魏李景使于梁十一月梁武遣使來

三年正月帝遣兼散騎嘗侍李獎使于梁七月梁武遣使來十月遣中書舍人尉瑾使于梁

四年五月梁武遣使來七月遣兼散騎嘗侍元廓使于梁

五年正月梁武遣使來四月帝遣兼散騎嘗侍李緯使于梁

六年九月梁武遣使來

七年二月遣兼散騎嘗侍鄭伯猷使于梁時魏收為

散騎嘗侍兼中書舍人自魏梁和好書下紙每云想彼境內寧靜此率土安和梁後使其書乃去彼宇自稱猶著此欲示無外之意收定報書云想境內清晏今萬國安和梁人復書依以為禮

北齊文宣帝天保元年十一月梁湘東王蕭繹遣使朝貢

二年正月梁湘東王蕭繹遣使朝貢四月十日又遣使朝貢

三年十一月梁王蕭繹即帝位於江陵是為元帝遣使來聘

四年閏十一月梁元帝遣使來聘

五年十月西魏伐梁元帝於江陵詔清河王岳等率眾救之未至而江陵陷梁元帝為西魏將于謹所殺梁將王僧辯在建康共推晉安王蕭方智為太宰都督中外諸軍事承制置百官

六年正月清河王岳以眾軍渡江剋夏首送梁郢州刺史陸法和詔以梁散騎嘗侍貞陽侯蕭明為梁王遣尚書左僕射上黨王渙率眾送之五月蕭明入于建鄴按梁書云七月入于京師六月詔曰梁國遭禍主喪臣離邊彼炎方盡生荆棘興亡繼絕義在於我納以長君拯

其危弊比送梁主已入金陵蕃禮既修分義方篤越
 鳥之思豈忘南枝凡是梁民宜聽反國以禮發遣是
 月梁主蕭明遣其子章兼侍中表必兼散騎嘗侍楊
 裕奉表朝貢初明在梁為豫州刺史明梁武兵敗為
 魏擒之世宗高澄禮明甚重謂之曰先王與梁王和十
 有餘年間彼禮佛文嘗云奉為魏主并及先王此甚
 是梁王厚意不謂一朝失信致此紛擾自出師薄伐
 無戰不克無城不陷今日欲和非是方屈境上之事
 知非梁主本心當是侯景違命扇動耳朕可遣使諮
 論若猶存先王分義重成通和者吾不敢違先王之

旨侯及諸人並即放還於是使人以明書告梁主梁
 主乃致書以慰世宗是歲梁元帝為西魏所滅顯祖
 詔立明為梁主前所獲梁將湛海珍等皆聽從明歸
 令上黨王渙率眾以送是時梁太尉王僧辯司空陳
 霸先在建康推晉安王方智為丞相顯祖賜僧辯霸
 先璽書僧辯未奉詔上黨王進軍明又與僧辯書往
 復再三陳禍福僧辯初不納既而上黨王破東關斬
 裴之橫江表危懼僧辯乃啓上黨王求納明遣舟艦
 迎接上黨王饗梁朝將士及與明刑牲歃血載書而
 盟於梁與東度齊師比及侍中裴英起衛送門入建

康遂稱尊號以方智為太子是冬霸先襲殺僧辯復
立方智以明為太傅明疽發背殂

八年十月陳高祖武帝立遣使稱藩朝賀

十年三月梁主蕭莊至郢州遣使朝貢九月使酈懷

則陸仁惠使於蕭莊莊在梁為永嘉王蕭明殂帝以

莊主梁祀自盜賊城濟江卽位于郢州莊為陳人所

敗入朝封侯朝廷許以興復竟不果

武成帝河清元年正月詔散騎嘗侍崔瞻聘於陳十

月陳人來聘十一月詔兼散騎嘗侍封李琰使於陳

十二月陳人來聘

三年四月詔兼散騎嘗侍皇甫亮使於陳六月歸宇

文媪于周九月歸閻媪于周陳人來聘

四年四月陳人來聘

後主天統元年六月太上皇帝詔兼散騎嘗侍王季

高使於陳

二年三月陳人來聘六月太上皇帝詔兼散騎嘗侍

韋道儒聘於陳十二月陳人來聘

三年四月太上皇帝詔兼散騎嘗侍司馬幼之使於

陳

九年周人來通和太上皇帝詔侍中斛斯文略報聘

于周十一月太上皇帝詔兼散騎嘗侍李諧使于陳
五年二月詔侍中比烈長文使於周

武平元年正月詔兼散騎嘗侍裴讞之聘于陳

二年正月詔兼散騎嘗侍劉環儁使於陳四月陳遣
使連和謀反周朝議弗許九月陳人來聘十一月詔
侍中赫連子悅使於周

三年三月周人來聘八月使領軍封輔相聘于周九
月陳人來聘

四年正月詔兼散騎嘗侍崔象使於周二月周人來
聘四月又來聘六月詔開府王師使於周

却貢獻

古者貢獻之制有藝有極苟非其道庸可而乎觀夫
宋齊而下逮於梁室雖眷命攸屬而運歷非正乃有
恭己脩德稽古發號不寶遠方之物不納非時之貢
志存抑損道符簡易斯亦一時之美足垂於後焉
宋高祖永初中廣州嘗獻入筒細布一端八丈惡其
精麗勞人卽付有司彈太守以布還之并制嶺南禁
作此布帝素有熱病并患金創末年尤劇坐卧嘗須
冷物後有人獻石林寢之極以爲佳乃嘆曰木牀甚
費而况石耶卽令毀之

南齊太祖建元元年四月即位斷四方上慶禮

明帝建武元年四月即位詔斷遠近上禮又詔蕃牧

守宰或有薦獻事非任土嚴加禁斷十一月立皇太

子詔東宮肇建遠近或有慶禮可悉斷之

二年十月皇太子納妃褚氏斷慶禮

三年閏十二月皇太子冠斷遠近上禮

梁高祖天監元年四月即位斷遠近上慶禮八月交

州獻能歌鸚鵡詔不納

二年五月斷諸郡縣獻奉二宮唯諸州及會稽職惟

嶽牧許薦任土若非地產亦不得貢

十四年正月加皇太子冠停遠近上慶禮

陳宣帝大建七年四月監豫州陳桃根於所部得青

牛獻之詔遣還民

梁太祖乾化二年以丁審衢為陳州而審衢厚以鞍

馬金帛為謝恩之獻帝慮其漁民復其獻而停之

冊府元龜

冊府元龜

閏位部

卷之三百二十五

三十四

四月即位

高祖... 宣帝... 漢... 魏... 晉... 宋... 齊... 梁... 陳... 隋... 唐... 宋... 元... 明... 清... 宣統...

册府元龜

淮南李嗣京叅閱

西極文翔鳳訂正

豫章黃國琦較釋

閏位部 三十五

征伐

秦始皇元年晉陽反將軍蒙騫擊走之

二年庶公將卒攻卷斬首三萬

三年蒙騫攻韓取十三城十月攻魏氏賜有詭

四年拔暘有詭

册府元龜 閏位部

五年將軍蒙騫攻魏定酸棗燕虛長平雍丘山陽城皆拔之取二十城

六年韓魏趙衛楚共擊秦取壽陵秦出兵五國罷拔衛迫東郡其君角率其支屬徙居野王阻其山以保魏之河內

七年將軍蒙騫以攻龍狐慶都慶一作鹿浞兵攻汲

八年始皇弟長安君成蟜將軍擊趙九年攻魏垣蒲陽

十一年王翦桓齮楊端和攻鄴取九城王翦攻闕與在并州潦楊皆竝為一軍翦將十八日軍歸斗食以下

百石以下有斗食佐史之秩什推二人從軍取鄴安陽桓齮將

十三年桓齮攻趙平陽殺趙將扈輒斬首十萬十四年桓齮攻趙軍於平陽取宜安破之殺其將軍桓齮定平陽武城

十五年大興兵一軍至鄴一軍至太原取狼孟太原有狼

孟縣十七年內史騰攻韓得韓王安盡納其地以其地為郡命曰潁川

十八年大興兵攻趙王翦將上地下井陘山名在嘗山今為縣

端和將河內羗羗伐趙端和圍邯鄲城



十九年王翦羗魏盡定取趙地東陽得趙王引兵欲
攻燕屯中山趙公子嘉率其宗數百人之代自立為
代王東與燕合兵軍上谷

二十年燕太子丹患秦兵至國恐使荆軻刺秦王秦
王覺之體解軻以徇而使王翦辛勝攻燕燕代發兵
擊秦軍秦軍破燕易水之西

二十一年王賁攻薊乃益發卒詣王翦軍隨破燕太
子軍取燕薊城得太子丹之首燕王東收遼東而王
之

二十二年王賁攻魏引河溝灌大梁大梁城壞其王
請降盡取其地

二十三年復召王翦強起之使將擊荆取陳以南至

平輿汝南有平輿縣虜荆王秦王游至郢陳荆將項燕立昌

平君為荆王反秦於淮南淮一作江

二十四年王翦蒙武攻荆破荆軍昌平君歿項燕遂
自殺

二十五年大興兵使王賁將攻燕遼東得燕王喜遷

攻代虜代王嘉王翦遂定江南地降越君置會稽郡

二十六年齊王建與其相后勝發兵守其西界不通
秦秦使將軍王賁從燕南攻齊得齊王建



三十三年發諸嘗逋亡人贅壻贅謂窮有子使就其婦家為贅壻賈

人略取陸梁地為桂林今鬱林是象郡今日南南海以適遣

遣戍五十萬人守五嶺

二世元年七月戌卒陳勝等反故荆地為張楚張大楚國

也勝自立為楚王周文自言習兵勝與之將軍印西

擊秦行收兵至關車千乘卒十萬至戲軍馬戲水名在新豐

東秦令少府章邯免驪山徒人奴產子奴產子猶今人云家生奴

也悉發以擊楚軍大敗之周文走出關止屯曹陽曹水

之陽也其水出陝縣西南峴頭山西北流入河今謂之好陽澗在陝縣西四十五里

二月餘章邯追敗之復走澠池十餘日章邯擊破之周文自刎

軍遂不戰

蜀先主章武三年三月漢嘉太守黃元以先主疾舉

兵攻臨邛縣遣將軍陳胥討元元軍敗順流下江為

其親兵所縛生致成都斬之

後主建興元年夏牂牁太守朱褒擁郡反先是益州

郡有大姓雍闓反流太守張裔於吳據郡不賓越雋

夷王高定亦皆叛

三年三月丞相諸葛亮南征四郡皆平

七年春丞相諸葛亮遣陳式攻武都陰平遂克定二

郡

吳大帝黃武二年戲口守將晉宗殺將王直以衆叛如魏魏以為斬春太守數犯邊境帝令將軍賀齊糜芳劉邵等襲斬春郡等生虜宗

嘉禾三年八月以諸葛恪為丹陽太守討山越

四年夏遣呂岱討廬陵賊李桓等赤烏元年春破之

六年二月以陸遜討鄱陽賊彭旦等其年皆殺之

赤烏二年十月將軍蔣祕南討夷賊祕所領都督廖

式殺臨賀太守嚴綱等自稱平南將軍與弟潛共攻

零陵桂陽及搖動交州蒼梧鬱林諸郡衆數萬人遣

將軍呂岱唐咨討之歲餘皆破

廢帝太平二年八月會稽南郡反殺都尉鄱陽新鄱

民為亂廷尉丁密步兵較尉鄭曹將軍鍾離牧率軍

討之

後主寶鼎元年十月永安山賊施但等聚衆數千人

永安今武康縣劫後主庶弟永安侯謙屯烏程北至建業衆

萬餘人丁固諸葛靚逆之於牛屯大戰但等敗走

天紀三年夏合浦太守修允部曲督郭馬與部曲將

何典王族吳述殷興等攻殺廣州督虞授馬自號都

督交廣二州諸軍事興廣州刺史述南海太守典攻

蒼梧族攻始興八月以執金吾滕循循一作修假節領廣

州諸軍事

州牧率萬人從東道討馬興族遇於始興未得前馬
 後南海太守劉略逐廣州刺史徐旗又遣徐陵督陶
 濬將七千人從西道命交州牧陶璜部伍所領及合
 浦鬱林諸郡兵當與東西軍共擊焉未克而吳降
 晉循師遂還
 宋文帝元嘉三年正月遣中領將軍到彥之征北將
 軍檀道濟討荊州刺史謝晦擒之

孝武帝孝建元年二月豫州刺史魯爽車騎將軍江
 州刺史臧質丞相荊州刺史南郡王義宣襄州刺史
 徐道寶舉兵反遣佐衛將軍王玄謨大破之薛安都
 時為左軍將軍爽反帝遣安都及冗從僕射胡子反

龍驤將軍宗越率步騎據歷陽爽遣將鄭德玄戊大
 峴德玄使前鋒楊胡與輕兵向歷陽安都遣宗越及
 歷陽太守程天祚逆擊破之斬胡與其軍副德玄
 復使其司馬梁嚴屯峴東安都幢主周文恭晨往偵
 候因而襲之悉擒賊也敢進世祖詔安都留三百人
 守歷陽度還采石遷輔國將軍竟陵內史四月魯爽
 使弟瑜卒三千人據小峴爽尋以大衆阻大峴又遣
 安都步騎八千度江與歷陽太守張幼緒等討爽安
 都副建武將軍譚金率數十騎挑戰斬其偏帥幼緒
 惟怯輒引軍退還安都復還歷陽臧質久不至世祖

復遣沈慶之濟江督統諸軍夾軍食少引退慶之使
 安都率數騎追之四月丙戌及爽於小峴爽自與腹
 心壯騎斷後譚金先薄之不能入安都望見爽便躍
 大呼直往刺之應手而倒左右范雙斬爽首爽累世
 梟猛生習戰陣咸云萬人敵安都獨單騎直入斬之
 而反時人皆云關羽之斬顏良不是過也

大明三年四月司空南兖州刺史竟陵王誕據廣陵
 反以沈慶之為車騎大將軍開府儀同三司南兖州

刺史討之八月己巳克廣陵城斬誕

初慶之至廣陵
 誕遣客慶之宗

人沈道愍齎書說慶之餉以王環刀慶之遣道愍反
 數以罪惡慶之至城下誕登樓謂之曰沈君白首之

年何為來此慶之曰朝廷以君狂愚不足勞少壯故
 使僕來爾誕又餉慶之食提挈者百餘人出自北門
 慶之不開悉焚之誕於城上投函表倩慶之為送慶
 之曰我奉詔討賊不得為汝送表汝必歸允朝廷自
 應開門遣使吾為汝送護之
 自四月至七月乃屠城斬誕

明帝即位四方反叛遣龍驤將軍張興世領水軍拒
 南賊於赭圻築二城於胡口偽龍驤將軍陳慶領舸
 於前為遊擊軍興世率龍驤將軍佼長生董凱之攻
 克二城因擊慶慶戰大敗投水死者數十人時臺軍
 據赭圻南賊屯鵠尾相持久不決興世欲率所領真
 取大雷而軍旅未集示不足分張會薛索兒平定帝
 使張永以步騎五千留戍盱眙餘衆三萬人悉遣南

討山陽又尋平徵阮佃失所領諸軍悉還南伐衆軍大集乃分戰士七千配興世興世乃令輕舸沂流而上旋復廻還一二日中輒復如此使賊不爲之備劉胡聞興世欲上笑之曰我尚不敢越彼下取揚州張興世何人欲輕據我上與世謂沈攸之等曰上流唯無難江有洄湫船下必來泊岸有橫浦可以藏船舸二三爲宜乃夜渡湖口至鵲頭因復廻下以疑之其夜四更值風便舉帆直前賊亦遣胡靈秀諸軍於東岸相翼而上興世夕在景江浦宿賊亦不進夜潛遣

黃道標領七十舸徑據錢谿營立城砦明旦興世與軍齊集停一宿劉胡自領水步二十六軍平旦來攻將士欲迎擊之興世禁之曰賊來尚遠而氣盛矢驟驟旣力盡盛亦易衰此曹劌之所以破齊也將士率不得妄動治城如故俄而賊來轉近舫如洄湫興世乃命壽寂之任農夫率壯士數百擊之乃與衆軍相繼進胡於是敗走斬級數百投水者甚衆胡收軍而下時興世城壘未固司徒建安王休仁慮賊並力攻錢谿欲分其形勢命沈攸之兵喜俊長生劉靈遺等以皮艦二十攻賊濃湖苦戰連日斬獲千數是日劉

胡果率衆軍欲更攻興世未至錢谿數十里袁顛以
濃湖之急遽追之錢谿城砦繇此得立賊連戰轉敗
興世又過其糧道尋陽遣運至南陵不敢下賊衆漸
飢劉胡乃遣顛安北府司馬爲右軍沈仲玉領千人
步取南陵迎接糧運仲玉至南陵領米二萬斛錢布
數十舫豎榜爲城規欲突通行至貴口不敢進遣間
信報胡令遣重軍援接興世肅寂之任農夫李安民
等三千人至貴口擊之與仲玉相持交戰盡日仲玉
走還顛營悉虜其資實賊衆大震胡棄軍遁走袁顛
仍亦奔散

泰始元年十月冬晉安王子勛僭位於尋陽城帝遣
散騎嘗侍領軍將軍王玄謨領水軍南討吳興太守
張永爲其後繼又遣寧朔將軍尋陽內史沈攸之寧
朔將軍江方典龍驤將軍劉靈貴率衆屯虎檻時東
賊甚急張永江方典廻軍東討尚書下符曰夫晦明
遞運崇替相公帝造之基懋業維永聖祖重光氤氳
上業征昏承祀國難以柰毒流九縣曩穢三靈縉紳
戮辱黔庶塗炭人神同情朝野泣血聖上明睿在躬
膺符握曜眷懷家國夙夜劬勞懼社稷湮蕪葵倫左
袵天威電發氛沴水消殄凶焦門不俟鳴條之旅殲

窄牧野無勞孟津之鉞華夷即晏晷緯還光鏗鏘間
 於管絃趨翔被於冠冕同軌仰化異域懷風劉子勛
 昏世稱兵義同翦惡明朝不戢罔識邪正窺窬畿甸
 逼邊兩江陵上無君暴於遐邇王赫斯怒興言討逆
 命彼上將治兵薄伐今遣寧朔將軍尋陽內史沈攸
 之輕銳七萬飛舟先邁龍驤將軍劉靈遣羽林虎旅
 連鋒繼進假節督南討前鋒諸軍事冠軍將軍兖州
 刺史殷孝祖驅濟河涇卒電擊雷動使持節車騎將
 軍江州刺史曲江縣開國侯王玄謨丞徒五萬董統
 前師使持節侍中司徒揚州刺史建安王休仁擁神

州之眾總督群師龍驤將軍劉卹寧朔將軍劉懷瓌
 步騎五千直指大雷寧朔將軍柳倫司州刺史龐孟
 虬淮穎突騎邪趣西陽使持節驃騎大將軍豫州刺
 史山陽王休祐總勒步師連旗百萬河舟代馬遄驚
 江濱越棘吳鉤交曜畿甸笳鼓動坤維金甲震雲漢
 犄角相望水陸俱發冠軍將軍武念率擁司之銳已
 據樊沔徐州刺史申令孫提彭宋剽勇陵塗炎奮皇
 上當親馭六師降臨江服旌旆掩雲舳艫咽海昔吳
 楚連衡燕淮勁悍塵擾區內聲沸秦中霧散埃滅豈
 非先鑒而嬰彼孤城以代該天之網迫此鳥合以抗

絡寓之師雲羅四掩霜鋒交集猶勁颺之拂細草烈
火之掃寒原樵卷之形昭然已著朝廷惻愍我僚吏
哀矜我士民竝亦何辜拘誤迷黨故加宣示令得自
新如其淪惑不改抵冒王威同焚既至雖悔奚補奉
詔以四王幼弱不幸陷難交兵之日不得妄加侵犯
若有逼損誅剪無貸左右主帥嚴相衛奉誑誤之罪

一無所問 二年八月 計平之

二年正月吳郡太守顧琛吳興太守王曇生義興太
守劉延熙晉陵太守袁標山陽太守程天祚竝舉兵
反遣鎮軍巴陵王休右統軍東討 二月計平之

後廢帝元徽二年五月江州刺史桂陽王休範舉兵

反以中領軍劉劭右衛將軍蕭道成前鋒南討出屯

新亭征北將軍張永屯白下前南兖州刺史沈懷明

戊石頭

南齊武帝永明八年八月荊州刺史巴東王子響反

遣丹陽尹蕭順之討之子響伏誅

海陵王延興元年九月晉安王子懋起兵遣中護軍

王玄邈討誅之

明帝永泰元年四月大司馬會稽太守王敬則舉兵

反五月遣輔國將軍劉山陽率軍討斬之



東昏侯永元元年八月丙辰揚州刺史安王始遙光據東府反遣領軍將軍蕭坦之致討尚書符遙光曰逆徒數敗皎然有徵于紀亂嘗刑茲罔赦蕭遙光宗室蚩庸才行鄙薄緒莫可望天路何階受遇自昔恩加猶子禮絕帝體寵越皇季旗章車服窮千乘之尊闔隍爽塏踰百雉之制及聖后在天親愛顧託詎言在耳德音猶存侮蔑天明罔畏不義無君之心履霜有日遂乃稱兵內犯竊發京畿自古巨釁莫斯爲甚今便分命六師弘宣九伐皇上當親御戎軒弘此廟略信賞必罰有如大江戊午斬遙光傳首

十一月太尉江州刺史陳顯達舉兵反於尋陽加護軍將軍崔慧景平南將軍督衆南討斬之

二年正月詔討豫州刺史裴叔業二月以衛尉蕭懿爲豫州刺史征壽春叔業病歿

梁高祖天監元年五月戊子江州刺史陳伯之舉兵反以領軍將軍王茂爲征南將軍江州刺史率衆討之

十年三月劉晰以胸山引魏軍遣振遠將軍馬仙琕討之是月魏徐州刺史盧昶率衆赴胸山十二月仙琕大破魏軍復克胸山城

中大通二年八月山賊聚結寇會稽郡所部縣九月假超武將軍湛海珍節以討之

大同十年妖賊王勤宗起于巴山郡以威遠將軍陳昕為宣猛將軍假節討平之

太清二年八月大將軍侯景舉兵反擅攻馬頭木柵

荆山等戍以前將軍開府儀同三司邵陵王綸都督

眾軍討景

元帝大寶元年九月侯景偽將任約寇西陽武昌遣

左衛將軍徐文盛右衛將軍陰子春太子右衛率蕭

慧正雋州刺史席大獻等下武昌拒約

二年五月帝遣遊擊將軍胡僧祐信州刺史陸法和

率眾下秣陵任約敗景遂遁走以王僧辯為征東將

軍開府儀同三司尚書令胡僧祐為領軍陸法和為

護軍將軍仍令僧辯率眾追景所至皆捷僧辯為鎮衛將軍侍

中尚書令時湘州賊陸納等攻破衡州刺史丁道貴於淥口盡收其軍實李洪雅又自零陵率眾出空陵灘稱助討納朝廷未達其心深以為慮乃遣中書舍人羅重散徵僧辯上就拜驃騎將軍宜豐侯循南征僧辯因督杜崩率眾軍發於建業師次巴陵詔僧辯為都督東上諸軍事驃騎霸先讓都督於僧辯不受故世祖分為東西都督而俱南討焉時納等下據車輪夾岸為城前斷水勢士卒驍猛皆百戰之餘僧辯憚之不與輕進於是稍作連城以逼賊賊見不敢交鋒竝懷懈怠僧辯因其無備命諸軍水步攻之親執旗鼓以誠進止於是諸軍競出大戰於車輪與驃騎循竝力苦攻陷其二城賊大敗走步歸保長沙驅逼

居民入城拒守僧辯追躡乃命築壘圍之悉令諸軍
 廣建圍柵僧辯出坐壘上而自臨視賊望識僧辯知
 不設備賊黨吳藏李賢明等乃率銳卒千人開門掩
 出象楯竝進遙趨僧辯時杜勣杜龕竝侍左右帶甲
 衛者皆百餘人因下送人與賊人交戰李賢明乘鎧
 馬從者十騎大呼衝突僧辯尚據胡牀不為之動於
 是指揮勇敢遂獲賢明而因即斬之賊乃退歸城內
 初陸納阻兵內逆以王琳為辭云朝廷若殺王琳納
 等自當降伏於是眾軍竝進未之許也而武陵王推
 眾上流內外駭懼世祖乃遣琳和鮮之至是湘州平

陳武帝永定二年十月遣鎮南將軍開府儀同三司

周文育都督眾軍出討余孝勵

文帝天嘉二年十一月東陽太守留異叛舉兵戍下

淮及建德帝乃下詔曰昔四罪難弘大媯之所無赦

九黎亂德少昊之所必誅自古皇王不貪征伐苟為

特蠹事非獲已逆賊留異數應亡滅繕甲完聚繇來

積年進謝群龍自躍於千里退懷首鼠嘗特於百心

中歲密契番禺既弘天網賜以名爵敦以國姻儻望

懷音猶能革面王琳竊據中流翻相應接控引南川

之嶺路專為東道之主人結附凶渠唯欣禍亂既妖

氛濫定氣沮心孤類傷鳥之驚弦等窮獸之謀觸雖

復遣家入質子陽之態轉適侍子還朝隗囂之心方

熾朕志相成養不計疵慝披襟解帶敷喻殷勤蜂目

彌彰梟聲無改遂置軍江口嚴戍下淮顯然反叛非

可容匿且晉邦膏腴稽南殷曠永割王賦長壅國民

竹箭良材絕望京輦萑苻小盜共肆貪殘念彼餘阡
兼其慨息西戎屈膝自歎重關秦國依風竝輸侵地
三邊已乂四表咸寧唯此微妖正宜靖殄可遣使持
節都督南徐州諸軍事征北將軍司空南徐州刺史
桂陽郡開國公侯安都指揮往擒戮罪止異身餘無
所問先是晉安太守陳寶應娶留異女爲妻侯安都
之討異也寶應遣兵助之又資周迪兵糧出寇臨川
及都督章昭達於東興南城破迪帝因命昭達都督
衆軍繇建安南道渡嶺又命益州刺史領信義太守
余孝頃都督會稽東陽臨海永嘉諸軍自東道會之

以討寶應竝詔宗正絕其屬籍於是尚書下符曰嘗
晉安士庶昔隴西旅拒漢不稽誅遼東叛渙魏申宏
略若夫無諸漢之策勲有扈夏之同姓至於納吳淠
之子致橫海之師違姒啓之命有甘誓之討况廼族
不繫於宗盟名無紕於羹噐而顯成三叛釁深四罪
者乎案閩寇陳寶應父子卉服支孽本迷愛敬梁季
喪亂閩隅阻絕父旣豪俠扇動蠻貊椎髻箕坐自爲
渠帥無聞訓義所資姦諂爰肆蜂豺俄而解印炎行
方謝網漏吞舟日月居諸棄之度外自東南王氣寔
表聖基斗牛聚星允符玉迹梯山航海雖若款誠擅

割懷珍競致職貢朝廷遵養含弘寵靈隆赫起家臨
郡兼畫繡之榮裂地置州假藩麾之盛卽封戶牖仍
邑櫟陽乘華轂者十人保弊廬而萬石又以盛漢君
臨推恩婁敬隆周朝會廼長滕侯繇是紫泥青紙遠
賁恩澤鄉亭龜組頌及嬰孩自谷遷喬孰復爲擬而
苞藏鳩毒敢行狼戾連結留異表裏周廼盟軟婚姻
自爲唇齒屈彊山谷推移歲時及我發騎防山定秦
望之西部戈船下瀨克滙澤之南川遂敢舉斧竝耶
凶孽莫不應弦摧斲盡殪醜徒每以罪在首渠憫茲
驅逼所收俘馘竝勒矜放仍遣中使爰降詔書天網

恢弘猶許改易異旣走險廼又逃刑誑侮王人爲之
川藪遂使袁熙請席遠歎頭行馬援觀蛙猶安井底
至如遇絕九賦剽掠四民闔境資財盡室封奪凡厥
蒼頭皆略黔首蝥賊相扇叶契連蹤乃復踰趙瀛溟
寇擾浹口侵軼嶺嶠掩襲述城縛掠吏民焚燒官寺
此而可縱孰不可容今遣沙州刺史俞文冏明威將
軍程文季假節宣猛將軍成州刺史甘他假節雲旗
將軍譚瑋假節宣猛將軍前監臨海郡陳思慶前軍
將軍徐智遠明毅將軍宜黃縣開國侯慧紀開遠將
軍新除晉安太守趙彖持節通直散騎嘗侍壯武將

軍定州刺史康樂縣開國侯林馮假節信威將軍都督東討諸軍事益州刺史余孝頃率羽林二萬蒙衝蓋海乘跨滄波掃蕩巢窟此皆明耻教戰濡須鞠旅累從楊僕亟走孫恩斬蛟中流命馮夷而鳴鼓龜鼉爲駕輪方壺而建旗義安太守張紹賓忠誠效到累使永軍南康內史裴忌新除輕軍將軍劉峰東衡州刺史錢道戢竝卽遣人仗與紹同行故司空歐陽公昔有表奏請宣薄伐遙途意合若伏波之論兵長游遺誠同子顏之勿救征南薨謝上策無忘周南餘恨嗣子弗忝廣州刺史歐陽紇克符家聲聿遵廣略舟

師步卒二萬分趨水扼長鯨陸掣封豕董率衡嶺之師會我六軍潼州刺史李曙明州刺史戴晃新州刺史區白獸壯武將軍循行師陳留太守張遂前安成內史闕慎前廬陵太守陸子隆前豫寧太守任蠻奴巴山太守黃法慈戎昭將軍湘東公世子徐敏成吳州刺史魯廣達前吳州刺史遂興縣開國侯詳使持節都督征討諸軍事散騎嘗侍護軍將軍昭達率總騎五千組甲二萬直度仰武仍頓進安案響揚旗夷山湮谷指期荷角以制飛走前宣武太守錢肅臨川太守駱牙太子左衛率胡詡尋陽太守莫景隆豫章

太守劉廣德竝隨機鎮遇絡驛在路使持節散騎常侍鎮南將軍開府儀同三司江州刺史新建縣開國侯法甌戒嚴中流以為後殿斧鉞所臨罪唯元惡及留異父子其黨王帥雖有請泥函谷相肯淮陰若能翻然改圖因機立効非止肆眚乃加賞擢其建晉士民久被驅迫者大軍明加撫慰各安樂業流寓失鄉即還本土其餘立功立事已具賞格若遂迷不改同惡趨趨斧鉞一臨罔知所赦昭達已克周迪踰東嶺頓於建安余孝頃又自臨海道襲子晉安寶應據建安之潮際逆拒王師水陸為柵昭達深溝高壘不

與戰但命軍士伐木為籓俄而水盛乘流放之突其

水柵仍水步薄之寶應亂身奔山草間窮而就執竝

其子弟二十人送都斬于建康市

初留異據橐東陽安都奉詔率眾討

之異本謂臺軍繇錢塘江而上安都乃步繇會稽之諸暨出永康異大恐奔桃枝嶺處岩谷間於壘監柵以拒王師安都作連城攻異躬自接戰為流矢所中血流至足安都乘輿與麾軍容止不變因其山隴之勢擁而為堰天嘉三年夏潦水漲滿安都引船入堰起樓艦與異城等放拋碎其樓雉異與第二子忠臣脫身奔晉安虜其妻子盡收其人馬甲服振旅而歸

廢帝光大元年四月乙未安南將軍湘州刺史華皎謀反以中撫大將軍淳于量為使持節征南大將軍總率舟師以討之

宣帝太建元年十月新除左衛將軍歐陽紇據廣州
舉兵反遣車騎將軍開府儀同三司章昭達率眾討
之二年二月擒斬之

東魏孝靜帝天平元年閏十二月梁高祖以元慶和
為魏王入據平瀨鄉遣尚書右僕射元晏為東南道
行臺破走之

武定二年二月徐州人劉烏黑聚眾反遣行臺慕容
紹宗討平之

五年二月司徒河南大行臺侯景降于梁以尚書左
僕射慕容紹宗為東南道行臺與大都督高嶽潘都

樂大破之

北齊武成帝河清元年七月太祖冀州刺史平秦王
歸彥據州反詔大司馬段韶司空婁睿討擒之斬歸
彥竝其二子及黨與二十人于都市

梁太祖開平二年六月壬戌岳州為淮寇所據上以
此郡五嶺三湘水流會合之地委輸商賈靡繇於斯
遂令荆襄湖南皆舉舟師悉力攻討王師既集淮夷
毀壁焚俘郭而遁

三年六月庚戌同州節度使劉知俊據本郡反制令
削奪劉知俊在身官爵仍徵發諸軍速令進討如有

軍前將士懷忠烈以知機賊內朋徒憤脅從而識變
 便能梟夷逆監擒獲兗渠務立殊功當行厚賞活捉
 得劉知俊者賞錢一萬貫文便授忠武軍節度使並
 賜莊宅各一所如活捉得劉知浣者賞錢一萬貫文
 便與除刺史有官者超轉三階無官者特授兵部尚
 書如活得劉知俊骨肉及近上都將並梟送闕廷者
 賞賜有差

是月知俊奔于鳳翔同州平

十一月靈州奏鳳翔賊將劉知俊率邠岐秦涇之師
 侵迫州城帝遣陝州康懷英華州寇彥卿率兵攻迫
 邠邠寧以緩朔方之寇

四年四月鎮海軍節度使錢鏐擊高澧於湖州大敗
 之梟夷擒殺萬人拔其郡湖州平先是澧以州叛入
 淮南故詔鏐討之也

七月劉知俊攻逼夏州以宣化軍留後李思安為東
 北面行營都指揮使陝州節度使楊師厚為兩路行
 營招討使九月乙巳王師敗蕃寇於夏州初劉知俊
 誘沙陁振武賊帥周德威涇原賊帥李繼齋合步騎
 五萬大舉欲俯拾夏臺節度使李仁福兵力俱乏以
 急來告先是供奉官張漢玫宣諭在壁國禮使杜廷
 隱賜幣于夏及石堡寨聞賊至以防卒三百人馳入

州既而大兵圍合廷隱漢攻與指揮使張初李君用
 率州民防卒與仁福部分固守晝夜戮力踰月及鄜
 延援至天軍奪擊敗之河東邠岐賊分路逃遁夏州
 圍解丙午詔曰劉知俊貴為方伯尊極郡王而乃背
 誕朝恩竄投賊壘因人神之共怒諒天地所不容雖
 命討除尚稽擒戮宜懸爵賞以大功名必有忠貞威
 思憤發有生擒劉知俊者賞錢千萬授節度使首級
 次之得孟審登者錢百萬除刺史得將孫坑卓瓌劉
 儒張鄰等賞有差

十一月以寧國軍節度使王景仁克北回行營都招
 討使潞州副招討使韓勁為副湘州刺史李思安為
 先鋒使時鎮州王鎔定州王處直叛結連晉人故遣
 將討之

冊府元龜

閩位高

冊府元龜

征伐

卷之三百二十六

淮南李嗣京參閱
 西極文翔鳳訂正
 豫章黃國琦較釋
 閏位部 三十六
 交侵

冊府元龜

淮南李嗣京參閱

西極文翔鳳訂正

豫章黃國琦較釋

閏位部 三十六

交侵

春秋傳曰疆場之事一彼一此何嘗之有當鼎國分
 據暨南北更王迄於朱梁咸務兵戰用寧守宇至乃
 略地以闢國攻城以拓土爭要害之形勢騁變詐之
 機略金革亟舉燧燧日燔飛輓相望污菜罔治士衆

冊府元龜

閏位部

卷之三百二十六

疲於轉鬪邊城患於驛騷而復勝敗相尋虛亢更伺
或知難而退獲免於數奔或允當而歸克遵於善志
抑兵者不祥之器蓋不得已而用之若乃爭奪嘗以
盡其民恃疆大而好於戰曷嘗不治失律之咎而貽
自焚之釁哉

蜀先主章武元年七月帥諸軍伐吳

其未卽位前交
侵事且勲業門

忿其襲殺關羽也吳王遣書請和先主盛怒不許吳
將陸議李異劉阿等屯巫秭歸將軍吳班馮習自巫
攻破異等軍次秭歸五溪蠻夷遣使請兵

二年正月先主軍還秭歸吳班陳式水軍屯夷陵夾

江東西岸五溪蠻夷咸相應鎮北將軍黃權督江

北諸軍與吳軍相拒於夷陵道夏六月為陸議所破

將軍馮習張楠等皆沒先主自猓亭

猓音許
交切

還秭歸

收合離散兵遂棄船舫繇步道還魚復

今萬
州是

吳將李

異劉阿等踵躡先主軍屯駐南山八月乃收兵還巫

十月吳主聞先主住白帝甚惧遣使請和先主許之

遣大中大夫宗瑞報命

後主建興五年春丞相諸葛亮出屯漢中營沔北陽
平石馬三日下詔曰朕聞天地之道福仁而禍淫善
積者昌惡積者喪古今嘗數也是以湯武之修德而

王桀紂極暴而亡曩者漢祚中微網漏凶慝董卓造
難震蕩京畿曹操階禍竊執天衡殘剝海內懷無君
之心子丕孤豎敢尋亂階盜據神器更姓改物世濟
其凶當此之時皇極幽昧天下無主則我帝命隕越
于下昭烈皇帝體明德光演文武應乾坤之運
出身平難經營四方人鬼同謀百姓與能兆民欣戴
奉順符讖建位易號丕承天序補弊興衰存復祖業
膺誕皇綱不墜於地萬國未靜早世遐殂朕以幼冲
繼統鴻基未習保傳之訓而嬰祖宗之重六合壅否
此稷不建永惟所以念在扶救光載前緒未有攸濟

朕甚懼焉是以夙興夜寐不敢自逸每崇菲薄以益
國用勸分務穡以阜民財受方任能以叅其聽斷私
降意以養將士欲奮劍長驅指討凶逆朱旗未舉而
丕復隕喪斯所謂不燃我薪而自焚也殘類餘醜又
支天禍恣睢河雒阻兵未弭諸葛亮丞相弘毅忠壯
忘身憂國先帝託以天下以勗朕躬今授之以旄鉞
之重付之以專命之權統領步騎二十萬眾董督元
戎龔行天罰除患寧亂克復舊都在此行也昔項籍
總一疆眾跨州兼土所務者大然卒敗垓下歿於東
城宗族如焚為笑千載皆以不義陵上虐下故也今

賊效尤天人所怨奉時宜速庶馮炎精祖宗威靈相助之福所向必克吳王孫權同恤災患潛軍合謀犄角其後涼州諸國王各遣月支康居胡侯富康植等二十餘人詣授節度大軍北出便欲率將兵馬奮戈先驅天命既集人事又至師貞勢并必無敵矣夫王者之兵有征無戰尊而且義莫敢抗也故鳴條之後軍不血刃牧野之師商人倒戈今旄麾首路其所經至亦不欲窮兵極武有能棄邪從正簞食壺漿以迎王師者國有賞典封寵大小各有品限及魏之宗族支葉中外有能規利害審逆順之數來詣降者皆原

除之昔輔果絕親於智氏而蒙全宗之福微子去殷項伯歸漢皆受茅土之慶此前世之明驗也若其迷沉不反將助亂人不式王命戮及妻孥罔有攸赦廣宣恩威貸其元帥吊其殘民他如詔書律令丞相其露布天下使稱朕意焉

六年春亮出攻祁山不克冬復出散關圍陳倉糧盡退魏將王雙率軍追亮亮與戰破之斬雙還漢中七年春亮遣陳式攻武都陰平遂克定二郡八年征西大將軍魏延破魏雍州刺史郭淮於陽谿九年三月亮復出軍圍祁山魏將司馬宣王張郃救

祁山六月亮糧盡退軍卻追至青封與亮交戰卻破箭射歿

延熙十二年秋衛將軍姜維攻魏雍州不克而還

十三年姜維復出西平不克而還

十六年四月姜維復率眾圍南安不克而還

十七年正月姜維還成都六月維三率眾出隴西冬

拔狄道河間臨洮三縣民居于縣竹繁縣

十八年春姜維還成都夏姜維率諸軍出狄道與魏

雍州刺史王經戰于洮西大破之退保狄道城維却

任鍾題

十九年春姜維進位大將軍督戎馬與鎮西將軍胡

濟期會上却濟失誓不至

二十年姜維率眾出駱谷至苻水

景耀五年姜維復率眾出侯和為鄧艾所破還任沓

中

吳大帝初為吳王未封王以前交蜀先主帥軍來伐

蜀章武元年也至巫山秭歸使使乃道武陵蠻夷五溪民皆

反為蜀帝以陸遜為督督朱然潘章等以拒之

黃武元年蜀章武二年也正月陸遜部將軍宋謙等攻蜀五

屯皆破之斬其將蜀軍分據險地前後五十餘營遜



隨輕重以兵應拒自正月至閏月大破之臨陣所斬及投兵降首數萬人先王奔走僅以身免

九月魏乃命曹休張遼臧霸出洞口曹仁出濡須曹真夏侯尚張郃徐晃圍南郡大帝遣呂範等督五軍以舟軍拒休等諸葛瑾潘璋楊粲救南郡朱恒以濡須督拒仁十一月大風範等溺死者數千人軍還江南曹休使臧霸以輕船五百敢死萬人襲攻徐陵燒攻城三殺略數百人將軍全琮徐盛追斬魏將尹盧殺獲數百

二年正月曹真分兵據江陵中州三月曹仁遣將軍嘗彫等以兵五千乘油船晨渡濡須中州仁子泰因引軍悉攻朱桓桓兵拒之遣將軍嚴圭等擊破彫等是月魏軍皆退

六月令將軍賀齊督麋芳劉邵等襲蘄春虜太守晉宗先是宗爲戲口守將殺其將王直以衆叛如魏魏以爲蘄春太守數犯邊境至是虜之

五年七月帝聞魏明帝初立征江夏圍石陽不克而還
七年五月鄱陽太守周魴僞叛誘魏將曹休八月帝至皖口使將軍陸遜督諸將大破休於石亭

黃龍三年夏中郎將孫布詐降以誘魏將王淩淩以軍迎布十月帝以大兵潛伏於阜陵俟之淩見而走嘉禾元年三月遣將軍周賀較尉裴潛乘海之遼東九月魏將田豫要擊斬賀於成山二年帝向合肥新城遣將軍全琮征六安皆不克還三年五月遣陸遜諸葛瑾等屯江夏沔口孫韶張承等向廣陵淮陽帝率大眾圍合肥新城是時蜀相諸葛亮出武功帝謂魏明帝不能遠出而明帝遣兵取司馬宣王拒亮自率水軍東征未至壽春遂還孫韶亦罷

六年十月遣衛將全琮襲六安不克

赤烏二年三月遣使者羊衞鄭胃將軍孫怡之遼東擊魏守將張持高慮等虜得男女

四年四月遣衛將軍全琮略淮南決芍陂燒安城即闔收其人民威北將軍諸葛恪攻六安琮與魏將王淩戰于芍陂中郎將秦晃等千餘人戰歿車騎將軍朱然圍樊大將軍諸葛瑾取柵中

六年春諸葛恪征六安破魏將謝順管收其人民是歲魏司馬宣王率軍入舒

九年二月車騎將軍朱然征魏柵中斬獲千餘

十年遣諸葛壹僞叛以誘諸葛誕誕以步騎一萬迎壹於高山大帝出涂中遂至高山潛軍以待之誕覺而還

十三年十二月魏大將軍王昶圖南郡荊州刺史王基攻西陵遣將軍戴烈陸凱往拒之皆引還

廢帝會稽王建興元年十二月魏使將軍諸葛誕胡遵等步騎七萬圍東興將軍王昶攻南郡毋丘儉向武昌甲寅太傅諸葛恪以大兵赴敵戊午兵及東興交戰大破魏軍殺將軍韓綜桓嘉等

二年三月諸葛恪率軍伐魏四月圍新城大疫兵卒

死者大半八月恪引軍還

五鳳二年正月魏鎮東將軍毋丘儉前將軍文欽以淮南之衆西入戰于樂嘉

閏月壬辰丞相孫峻及驃騎將軍呂據左將軍留贊率兵襲壽春軍及東興聞欽等敗壬寅兵進于橐臯欽詣峻降淮南餘衆數萬口來奔魏諸葛誕入壽春峻引軍還

二月孫峻及魏將軍曹珍遇于高亭交戰珍敗績留贊爲誕別將蔣班所敗於沘陵贊及將軍孫楞蔣修等皆遇害

三月使鎮南將軍朱異襲安豐不克

太平元年二月孫峻用征北大將軍文欽計將征魏

八月先遣欽及驃騎呂據車騎劉纂鎮南朱異前將

軍唐咨軍自江都入淮泗

後主建衡元年十一月遣監軍虞汜威南將軍薛珣

蒼梧太守陶璜田荆州監軍李勗督軍徐存從建安

海道皆就合浦擊交趾

宋文帝元嘉元年後魏明元帝自率眾至方城遣鄭

兵將軍達奚斤兵將軍公孫表二萬人於滑臺司

州刺史毛德祖時成虎牢遣步騎三千拒之魏剋滑

臺并力乘勝遂至虎牢魏主自率大衆至鄴鄭兵旣

克金墉還向虎牢又遣楚兵將軍涉歸東擊青州所

向城邑皆奔走明元自遣兵益虎牢增圍急攻德祖

大敗魏主領楚兵諸軍自滑臺西就兵共攻虎牢虎

牢被圍二百日遂克虎牢武帝未受禪已前
事并入功業門

五年十月淮北鎮將軍王仲德遣步騎二千餘人侵

後魏濟陽陳留閏月又遣將王玄謨兗州刺史竺靈

秀步騎二千人攻滎陽將襲虎牢

七年三月遣右將軍到彥之統舟師入河諸軍各有

所向先遣殿中將軍由奇使魏言河南舊是宋土爲



彼所侵今當修復舊境不關河北魏大武大怒謂奇
 曰我生頭髮未燥便聞河南是我家地爾豈可得若
 必進軍今權當斂戍相避須火行地淨河水冰合自
 更取之七月後將軍長沙王義欣出鎮彭城總統羣
 師彥之進軍魏碭碭及滑臺諸戍並棄城走以尹冲
 為司州刺史皮虎率十一月魏衆南渡河彥之敗退
 洛陽滑臺虎率諸城復為魏所陷尹冲死之是歲魏
 神龜三年也魏書云八月宋將到彥之自清水入河
 沂流西行帝以河南兵少詔攝四鎮乃
 治兵將西討丙寅到彥之遣將渡河攻治反叛冠軍
 將軍安頡督諸軍破之斬首五百餘級投水死者甚
 衆十月庚申到彥之王仲德治河置守還保東平
 亥冠軍安頡濟河攻洛陽丙子拔之擒宋將二十人

斬首五千級時河北諸軍會於七女津彥之恐軍南
 渡遣將王蟠龍沂流欲盜官船征南大將軍杜超等
 擊破斬之辛巳安頡虎率宋司州刺史尹冲墜城死
 甲午壽光侯叔孫建汝陰公長孫道生濟河到彥之
 王仲德從清入濟東走青州宋兗州刺史竺靈秀棄
 顯昌南奔湖陸戊戌叔孫建大破竺靈秀於湖陸殺
 獲五千餘人辛丑冠軍安頡率諸軍攻滑臺聊邪王
 司馬楚之破宋將于長社四年正月丙申宋將檀道
 濟王仲德從清水救滑臺丹陽王叔孫汝陰公長孫
 道生拒之道濟等不敢進二月辛酉安頡司馬楚之
 平滑臺擒宋將朱循之李元德及東郡太守申謨二
 月宋將檀道濟王仲德東走諸將追之至歷城而還
 三月庚戌冠軍將軍安頡
 獻宋俘萬餘人甲兵三萬
 八年正月征南大將軍檀道濟破魏軍於東壽張二
 月滑臺為魏所陷道濟引軍還
 二十年二月仇池為索虜所沒

二十三年三月魏軍寇豫青冀刺史申恬破之
二十七年二月魏攻汝南諸郡陳穎二郡太守鄭琨
汝陽潁川二郡太守郭道隱委守走魏軍攻懸瓠城
行汝南郡事陳憲拒之七月遣寧朔將軍王玄謨北
伐太尉江夏王義恭出次彭城總統諸軍魏碯礮戍
委城走閏月癸亥玄謨攻滑臺不克爲魏軍所敗退
還碯礮辛未雍州刺史隨王誕遣軍攻弘農城克之
丙戌又克關城十一月戊子魏軍陷鄒山魯陽平二
郡太守崔邪利沒甲午隨王誕所遣軍又攻陝城克
之癸卯左軍將軍劉康祖於壽陽尉武戌與魏軍戰

敗見殺十二月戊午內外戒嚴乙丑冗從僕射胡崇
之太子積弩將軍臧澄之建威將軍毛熙祚于盱眙
與魏軍戰敗并見殺庚午魏主率大衆至瓜步
二十八年正月丁亥魏軍自瓜步退走丁酉攻圍盱
眙城是月寧朔將軍王玄謨自碯礮退還歷下二月
丙辰魏軍自盱眙奔走時南平王鑠爲豫州刺史遣
中兵參軍胡盛之出汝南上蔡向長社戌主魯爽棄
城奔走旣克長社遣幢主王陽兒張畧等進據小索
魏豫州刺史僕蘭於大索率步騎二千攻陽兒陽兒
擊大破之坦之等進向大索勞楊氏鄭德玄張和各

起義以應坦之僕蘭奔虎牢會王陽兒等至即據大索因何虎牢鑠又遣安蠻司馬劉康祖繼坦之魏永昌王宜勒仁庫貢救虎牢坦之敗走魏軍乘勝遙追於尉氏津逢康祖康祖戰敗見殺進脅壽陽因東過與魏主會於江上魏荊州刺史魯爽及弟秀等率部曲詣鑠歸順是時魏主雖不克懸瓠而虜略甚多與帝書云往索真珠璫恡不相與今所截截鬪體可當幾許珠璫也彼徃日北通芮芮西結赫連蒙遜吐谷東連馮弘高麗凡此數國皆我滅之以此而觀彼豈能獨立我今北征先除有足之寇彼若不從命來秋

當復往取以彼無足不先致討諸方已定不復相釋我徃之日彼作何方計為塹城以自守為築垣以自障也

二十九年六月撫軍將軍蕭思話率眾北伐十月癸亥司州刺史魯爽攻虎牢不拔退還

孝武帝大明元年二月魏軍侵兖州

明帝泰始三年二月魏軍侵汝陰太守張景遠擊破之八月以中領軍沈攸之南行兖州刺史率眾北討

是歲魏獻文皇興元年也

魏紀云閏正月宋青州刺史沈文秀冀州刺史崔道固並遣使請舉州內屬詔平東將軍長孫陵平南將軍疾窮奇赴援之二月詔征南大將軍慕容白曜督



騎五萬次於碭礮為東道後援宋東平太守申纂戍無鹽過絕王使詔白曜討之三月文秀道固復叛歸宋白曜回帥討之拔宋肥城垣苗糜溝三戍四月白曜攻汴城八月攻歷城二年二月道固及宋果鄒戍主平原太守劉林賓舉城降三月白曜進圍東陽

四年十月發諸軍州兵北伐

五年正月乙丑魏克青州執刺史沈文秀以歸

七年十月遣將垣崇祖率眾二萬自柳州侵魏東兗

州屯于南城為刺史于維侯所敗崇祖還郁州

後廢帝元徽二年七月遣將侵魏緣淮諸鎮為魏徐

州刺史尉元擊敗之

順帝昇明元年十月葭蘆戍主楊文度遣弟鼠襲陷

魏仇池

七月又遣將伐魏仇池為魏陰平太守楊廣香所擊走之

南齊高帝建元二年正月魏軍侵淮泗遣眾軍北伐

內外戒嚴二月魏軍侵壽陽豫州刺史垣崇祖破走

之是月西境獻捷解嚴是歲魏孝文太和四年也

紀魏云齊徐州刺史崔文仲寇淮北陷莊眉戍二月遣尚

書游明根率二千騎南討八月梁州刺史崔惠景遣

長史裴叔寶率眾寇武興關城氏帥楊

鼠擊破之叔寶還南鄭莊音土鼠反

三年正月領軍將軍李安民左將軍孫文顯與魏軍

戰於淮陽大敗之初魏軍至緣淮驅略江北居民驚

冊府元龜 閏位部 十三

走不可禁乃於梁山置二軍南置三軍慈姥置一軍

洌州置二軍三山置二軍白沙州置一軍蔡州置五

軍自慈姥以下皆江南地名屬今昇州長蘆置三軍疏浦置二軍徐浦

置一軍長蘆已下州魏昌黎王馮莎向司州荒人栢

天生說莎云諸蠻皆響應莎至蠻竟不動莎大怒於

淮邊獵而去魏紀云南征諸軍擊破齊游擊將軍桓康於淮陽齊豫州刺史崇祖寇下蔡昌

黎王馮熙擊破之假寧郡王嘉大破齊軍俘獲三萬餘口

武帝永明六年四月遣將陳顯達攻陷醴陽魏左僕

射長樂王穆亮率騎一萬討之

十一年七月魏軍侵邊遣江州刺史李顯達鎮雍州

樊城

明帝建武二年正月魏軍攻豫司徐梁四州遣鎮南

將軍王廣之督司州征討右衛將軍蕭坦之督徐州

征討尚書右僕射沈文秀督豫州征討二月魏軍攻

鍾離徐州刺史蕭惠休破之詔太尉陳顯達使持節

都督西北征討諸軍事內外戒嚴三月司州刺史

誕與眾軍擊魏魏軍破之自壽春退走是月解嚴四

月魏軍圍漢中梁州刺史蕭懿拒退之是歲魏太和

十九年也魏紀云太和十八年十二月車駕南征至

懸瓠十九年正月講武於汝水之西二月

巡淮而東至鍾離是月班師

問位部

三年四月魏軍侵司州戍兵擊破之

四年魏侵沔北十月又侵司州遣太子中庶子梁王

右軍司馬張稷討之

是歲魏太和二十一年十二月魏書事備帝王親征門

十二月

丁丑遣度支尚書崔慧景率眾救雍州

永泰元年正月沔北諸郡為魏所侵相繼敗沒遣太

尉陳顯達持節救雍州二月遣左衛將軍蕭惠休假

節援壽陽豫州刺史裴叔業擊魏軍於淮北破之

東昏侯永元二年正月詔討豫州刺史裴叔業

時頓誅大

臣叔業俱而降魏

以衛尉蕭懿為豫州刺史征壽春叔業病

歿兄子積以壽春降魏三月遣平西將軍崔惠景率

衆軍伐壽春

魏書云宣武景明元年二月南齊豫州刺史裴叔業以壽春內屬二月齊將胡

松李居士率眾萬餘屯宛陳伯之水軍沂淮而上以

逼壽春四月彭城王勰車騎將軍王肅大懼之斬首

萬數七月齊又遣陳伯之寇淮南

八月彭城王勰破伯之於肥口

梁高祖天監元年五月魏揚州小峴戍主黨法宗襲

破大峴戍

二年八月魏將元興攻義陽陷寇軍將軍蔡靈恩等

十餘將

三年二月魏陷梁州八月陷司州是歲魏宣武正始

元年也

魏紀云正始元年一月梁將姜慶真襲陷壽春外郭州軍擊走之閏十二月梁行梁州事

夏侯道遷據漢中來降假尚書刑密鎮西將軍率眾以赴之二年四月蠻遣統軍王尼西伐頗破梁軍遂

入劔關六月梁將李暎等置營始平郡東涪水之北
王足逆擊敗之梁將魯方達攻竹亭足又破之方達
屯成新城足又遣統軍盧祖遷等擊敗之七月足又
逼涪城梁巴西大守庚域統軍王李暎等逆戰足擊
破之八月詔中山王英南討襄沔十一月足圍
涪城益州諸郡戍降者十二三遂引軍而退

四年十月大舉侵魏以中書將軍揚州刺史臨州王
宏都督北討諸軍事尚書右僕射柳惔為副

五年二月輔國將軍劉思效破魏青州刺史元擊於
膠水是月魏將陳伯之自壽陽率眾歸降五月太子

左衛率張惠之克魏宿預城臨川王宏前軍克梁城
豫州刺史常叡克合肥城廬江太守裴邃克羊石城

又克霍丘城六月青冀二州刺史桓和前軍克胸山

城十一月魏軍寇鍾離遣右將軍曹景宗率眾赴援

魏書云宣武王正始三年正月梁冀州刺史桓和入
寇南青州軍擊走之二月平南將軍陳伯之破梁徐
州刺史昌義之於梁城是月梁將蕭昞率眾五萬寇
淮陽以中山王英為征南將軍都督楊徐二道諸軍
事指授邊將五月梁張惠紹入寇陷宿豫蕭容陷梁
城常叡陷合肥城又陷羊石霍丘二城六月又陷小
岷成是月假平南將軍奚康生破梁將張惠紹斬其
徐州刺史宋黑詔發定冀瀛相竝肆六州十萬人以
濟南軍又詔平南將軍安樂王詒督後發諸軍以赴
淮南九月中山王英大破梁軍於淮南梁中軍大將
軍臨川王蕭宏尚書右僕射柳惔徐州刺史昌義之
等棄梁城涇淮東走追奔次於馬頭梁冠軍將軍戍
王朱思遠棄城宵遁擒送梁四千餘人斬獲士卒五萬有餘英遂攻鍾離

六年四月曹景宗常叡等破魏軍於邵陽洲斬數萬計

魏書云鍾離大水中
山王英敗績而還

七年十月詔大舉北伐以護軍將軍始興王憺為平

北將軍率眾入清車騎將軍王懋率眾回宿豫是月

魏懸瓠鎮軍主白卓生魏書云豫州刺史胡遜以

城內屬是歲魏永平元年也魏書云豫州城人白卓

南叛梁遣將齊荀仁等四將以助之詔尚書郎邢巒

行豫州事督將軍崔暹率騎討之是月邢巒大破卓

生及荀仁軍於魚口十二月又克懸瓠斬白卓生

擒齊荀仁等俘梁卒二千餘人分賜王公已下

八年正月魏鎮東參軍成景雋斬宿豫城主嚴仲寶

以城內屬魏書云正月梁遣王神念寇南兖詔輔國

將軍長孫稚假平南將軍為都督率統軍

邢虬等五軍以討之

十年三月盜殺東莞瑯琊二郡太守劉昕以胸山引

魏軍追振遠將軍馬仙琕討之是月魏徐州刺史率

眾赴胸山十二月仙琕大破魏軍斬馘十萬餘復克

胸山城魏書云四月梁遣其鎮北將軍張稷及馬仙

琕和大琕敗而還

十四年魏降人王足陳計求堰淮水以灌壽陽帝率

徐陽人二十萬戶取五丁以築之四月堰將合淮水

漂疾復決潰魏書云三月梁於浮山堰淮規為揚徐

刺史蕭寶寅為鎮東將軍决淮

堰寶寅東昏侯弟歸于魏也

九月遣將趙祖悅襲據硤石

十五年二月硤石為魏鎮南將軍崔亮鎮軍大將軍

李平所克

五月衡州刺史張齊侵益州爲魏將傅賢眼所敗是魏孝明熙平元年也

普通二年六月茂州刺史文僧明以州叛入於魏假大將軍裴邃節督衆軍北討

五年六月以員外散騎嘗侍元樹爲平北將軍北青冀二州刺史率衆北伐八月徐州刺史戎景雋克魏童城九月又克睢陵城北兖州刺史趙景悅圍荆山宣毅將軍裴邃襲壽陽入羅城弗克十月樹邃攻建陵城破之樹又破曲木掃虜將軍彭寶孫克瑯琊父

克檀丘城邃破狄又克覽城遂進屯黎時定遠將軍曹世宗破曲城又克秦墟魏鄆潘溪守悉棄城走東海太守常敬欣以司吾城降十一月寶孫克東莞城邃攻壽陽之安城克之馬頭安城竝來降十二月荆山城降武勇將軍李國興攻平靜關克之信威長史陽法乾攻武陽關又攻峴關竝克之

六年正月雍州前軍克新蔡郡又克鄭城二月趙景悅下龍亢城五月遣中護軍夏侯亶督壽陽諸軍北伐六月豫章王綜奔于魏魏復據彭城

七年十一月夏侯亶胡龍牙元樹曹世宗等衆軍克

壽陽城

大通元年正月司州刺史夏侯曇進軍三關所至皆克五月成景儁克魏臨潼竹邑十月魏東豫州刺史元慶和以渦陽內屬

十一月以中護軍蕭深藻為北討都督征北大將軍鎮渦陽

二年四月魏郢州刺史元願達以義陽內附時魏大亂其北海王元顥汝南王元悅竝來降十一月以元顥為魏主以東宮直閣將軍陳慶之衛送還北中大通元年四月陳慶之攻魏梁城夜之進屠考城

擒濟陰王元暉業五月克大梁又克虎牢城魏莊帝棄雒陽走河北元顥遂入洛陽尋為爾朱榮所殺二年六月遣魏汝南王元悅還北為魏主以魏尚書右僕射范遵為安北將軍司州牧隨元悅北討大同元年十月北梁州刺史蘭欽攻魏漢中克之二年十月乙亥詔大舉北伐十一月班師是歲東魏天平二年也

太清元年二月魏司徒侯景求以豫廣潁雒陽西揚東荆北荆襄東豫南兖西兖齊等十三州內屬三月追司州刺史楊鴉仁兖州刺史桓和仁州刺史湛海

珍等應接北豫六月以鄱陽王範為征北將軍總督漢北征討諸軍七月鴉仁入懸瓠城八月王師北伐以南豫州刺史蕭深明為大都督十一月魏遣大將軍慕容紹宗等至寒山丙午大戰貞陽侯深明敗績及北交州刺史胡貴孫等竝陷魏紹宗進圍潼州二年正月魏陷渦陽

簡文大寶二年五月魏遣大師潘雜辛等寇秦郡王僧辯遣杜崱帥眾拒之

孝元帝承聖二年正月西魏遣大將軍尉遲迥襲益州五月進逼巴西潼州刺史楊虔運以城降迥六月

迥圍陷益州九月西魏遣郭元建治舟師於合肥又遣大將軍杲遠步六年薩東方老成率眾會之

四年三月北齊遣其上黨王高渙送貞陽侯蕭深明來主梁嗣至東關遣吳興太守裴之橫與戰敗績之橫歿太尉王僧辯率眾出屯姑孰

敬帝太平元年三月齊遣大將蕭軌出柵口向梁山司空陳霸先軍主黃叡音逆擊大破之軌退保蕪湖

遣周文育侯安都率眾據梁山拒之四月侯安都輕兵襲齊行臺司恭於歷陽大破之五月庚寅齊軍水步入丹陽縣景申至秣陵故治勅周文育還頓方正

徐度頓馬牧杜陵頓大衍癸卯齊軍進據兒塘輿駕
出頓趙建故籬門內外戒嚴六月甲辰齊潛軍至蔣
山龍尾斜趨莫府山北至玄武湖西北乙卯司空陳
霸先授衆軍節度與齊軍交戰大破之斬齊北兗州
刺史杜方慶及徐嗣徽弟嗣宗生擒徐嗣產蕭軌東
方老王敬寶李希光裴英超劉歸義等皆誅之辛酉
解嚴

二年二月庚午遣領軍將軍徐度入東關戊子至合
肥燒齊船三千艘

後梁明帝天保五年陳湘州刺史華皎邕州刺史戴

僧朔來附皎送其子玄響爲質於梁仍率諸軍伐陳
明帝上言其狀周高祖詔衛公直督荊州總管權景
宣大將軍元定等赴之明帝亦遣其柱國王操率水
軍二萬會皎於巴陵旣而與陳將吳明徹等戰沌口
直軍不利元定遂沒梁大將軍李廣等亦爲陳人所
虜長沙巴陵竝陷於陳衛公直乃歸罪梁之柱國殷
亮明帝雖以退敗不獨在亮然不敢違命遂誅之吳
明徹乘勝攻克梁河東郡獲其守將許孝敬明徹進
寇江陵引江水灌城明帝出頓紀南以避其銳江陵
副總管高琳與其尚書僕射王操拒守梁軍主馬武

吉維等擊明徹退保公安明帝乃還江陵明帝之八年陳又遣其司空章昭達寇江陵總管陸騰及梁之將士擊走之昭達又寇竟陵之青泥明帝令其大將軍許世武赴援大爲昭達所破初華皎戴僧朔從衛公直與陳人戰敗率其麾下數百人歸於明帝明帝以皎爲司空封江夏郡公以僧朔爲車騎將軍封吳興縣侯明帝之十年皎將來朝至襄陽請衛公直曰梁主旣失江南諸郡民少國貧朝廷興亡繼絕理宜資贍豈使齊桓楚莊獨擅救衛復陳之美望借數州以俾梁國直然之乃遣使言狀周高祖許之詔以基

平都三州歸之於梁

陳高祖永定二年二月詔車騎將軍司空侯瑱總督水步軍以遏齊寇

文帝天嘉元年周將賀若敦獨孤盛等來攻巴湘以司空侯瑱爲西討都督大敗盛軍將餘衆自揚乘洲潛遁二年七月敦自拔遁歸人畜歿者十七八

宣帝大建五年三月分命衆軍北伐以鎮西將軍開府儀同三司吳明徹都督諸軍事

四月癸卯前巴州刺史魯廣達克齊大峴城辛亥吳明徹克秦州水柵庾申齊兵十萬援歷陽儀同黃法

蕤破之辛酉齊軍救秦州吳明徹又破之甲子南譙太守徐楊克石梁城

五月乙巳瓦梁城降癸酉陽平郡城降甲戌徐楊克
盧江郡城景子黃法蕤克歷陽城己卯北高塘郡城
降景戌廬陵內史任忠軍次東關克其東西二城進
克蘄城戊子又克譙郡城秦州城降癸巳爪步胡野
以城降

六月庚子鄭州刺史李綜克瀟口城乙巳任忠克合
州外城庚戌淮陽沘陽郡竝棄城走癸丑豫章內史
程文季克經州城乙卯宣毅司馬湛施克新蔡城癸

卯黃法蕤克合州城吳明徹師次仁州甲子克其州
城

七月戊辰齊遣衆二萬援高昌西陽太守周某名猗

廟諱破之己巳吳明徹軍次峽口克其北岸城南岸守

者棄城走周某克巴州城淮北絳城及穀陽士民竝
誅其渠帥以城降庚戌吳明徹克壽陽外城

八月乙未山陽城降壬寅盱眙城降壬子戎昭將軍
徐敬辯克海安城青州東海城降壬申高唐太守沈
善度克馬頭城甲戌齊安城降丙子左衛將軍樊毅
克廣陵楚子城丁亥前鄱陽內史魯天念克黃城小

丹元... 交侵

城齊軍退保大城壬辰黃城大城降

十月甲午郭默城降乙巳吳明徹克壽陽城丁未齊

兵萬人至穎口樊毅擊走之辛亥齊遣兵援蒼陵又

破之戊午湛陁克齊昌城

十一月淮陽城降庚辰威虜將軍劉桃根克胸山城

辛巳樊毅克濟陰城己丑魯廣達等克北徐州壬午

任忠克霍州城

六年正月甲申廣陵金城降

七年正月乙亥左衛將軍樊毅克潼州城

三月戊申樊毅克下邳高山等六城

閏九月都督吳明徹大破齊軍於呂梁

九年十月戊午司空吳明徹破周將梁士彥眾數萬

于呂梁

十年二月甲子北討眾軍敗績於呂梁司空吳明徹

及將卒以下竝為周軍所獲

十一年十一月周遣柱國梁士彥率眾至肥口戊戌

周軍進圍壽陽辛丑前豐州刺史畢文奏率步騎三

千趣陽平郡癸卯任忠率步騎七千趣秦郡景午新

除仁威將軍右衛將軍魯廣達遣卒眾入淮是日樊

毅領水軍二萬自東開入焦湖武毅將軍蕭摩訶率

步騎趣歷陽戊申豫州陷辛亥霍州又陷
十二月乙丑南北交晉三州及盱眙軍山陽陽平馬
頭秦歷陽沛北譙南梁等九州竝自拔還京師譙北
徐州又陷自是淮南之地盡沒於周矣

十二年八月庚申詔鎮西將軍樊毅進督沔漢諸軍
事遣平南將軍南豫州刺史任忠率眾趣歷陽通直
散騎嘗待趨武將軍陳慧紀為前軍都督趣南兖州
庚午通直散騎嘗待淳于陵克臨江郢癸酉智武將
軍魯廣達克郭默城景子淳于陵克祐州城

九月丁亥周將王延貴率眾援歷陽任忠擊破之生

擒延貴等

東魏孝靜帝天平二年二月梁司州刺史陳慶之寇
豫州刺史堯雄擊走之六月梁魏王元慶和寇南頓
堯雄大破之十月梁將抑仲禮寇荊州刺史王元擊
破之

三年九月以定州刺史侯景兼尚書右僕射南道行
臺節度諸軍南討十一月景攻克梁楚州獲刺史桓
和

是歲與
梁通好

四年十月西魏行臺宮景壽都指揮楊白駒寇維州
大都督韓賢大破之西魏又遣其子大行臺元季海

大都督獨孤信逼雒州刺史廣陽王湛棄城歸關季
海信遂據金墉

元象元年八月大破西魏之衆于河陰

武定五年九月梁武遣貞陽侯蕭明寇徐州堰泗水
於寒山灌彭城以應侯景十一月以尚書左僕射慕容
紹宗爲東南道行臺與大都督高岳潘相樂大破
擒之及其二子瑀遁十二月蕭明至關帝御閭闔門
讓而宥之岳等廻師討侯景

六年四月太尉高岳司徒韓軌大都督劉豐等討西
魏王思政於潁川引洧水灌其城

七年五月大將軍高澄帥師赴潁川六月克之獲大
將軍王思政等

北齊文宣天保元年十一月周文帝率衆至陝城分
騎北渡至建州帝親戎出次城東周文帝聞帝軍容
嚴盛嘆曰高歡不灰矣遂退師

二年五月景成合朔州刺史斛斯顯攻克梁歷陽鎮
七月癸酉行營邢景遠破梁龍安戍獲鎮城李雋文
三年三月以司州牧清河王岳爲使持節西道大都
督司徒潘相樂爲使持節東道大都督及行臺辛術
率衆南伐

六年正月壬寅清河王以衆軍渡江克夏首二月甲戌上黨王渙克譙郡

三月景戌上黨王渙克東關斬梁將梁之橫俘斬數千

七年三月丁酉大都督蕭軌等率衆濟江六月乙卯

蕭軌等與梁師戰于鍾山之西遇霖雨失利軌及都

督李希况王樞寶東方老軍司裴英起竝沒士卒散

還者十二三

武城河清二年十二月巳酉周將楊忠率突厥阿史

那木可汗等二十餘萬人自鎮州分爲三道殺掠吏

人已未周軍逼并州又遣大將軍達奚武帥衆數萬

東雍及晉州與突厥相應

三年正月周軍至城下而陳戰於城南周軍及突厥

大敗人馬歿者相枕數百里不絕

七月周軍三道竝出使其將尉遲迥寇雒陽楊標入

軹關權景宣趣懸瓠

十一月甲午周將尉遲迥等圍雒陽甲辰太尉婁叡

大破周軍於枳關擒楊標

十二月豫州刺史王士良以城降周將權景宣壬戌

太師段韶大破尉遲迥等解雒陽圍

梁太祖開平二年四月甲寅淮寇侵軹潭岳邊境欲
援朗州以戰艦百餘艘揚航西上泊鬲口湖南馬殷
遣水軍都將黃瑀率樓船遮擊之賊衆汭流宵遁追
至鹿角鎮

五月丁丑王師圍潞州將及二年李進通窮危旦夕
不俟攻擊當自降太原李存勗以厚幣誘結北蕃諸
部竝其境內丁壯悉驅南征決戰以救上黨之惡部
落帳族馳馬甲兵數路齊進於銅鞮樹寨旗壘相望
是月癸未淮賊寇荊州石首縣襄陽舉身師泆澆港
襲敗之

六月丙辰邠岐來寇雍西編戶因于逃避且芟害禾
稼結營自固踰月同州劉知俊領所部兵擊退襲至
幕谷大破之俘斬千計收其生噐甲宋文通僅以身
免

是月壬戌岳州爲淮賊所據帝以北郡五領三湘水
陸會合之地委輸商賈靡不繇斯遂令荆湘湖南北
舉舟師同方致討王師集淮夷毀壁焚郭郭而遁
十月巳亥上在陝兩浙節度使奏於嘗州東州鎮殺
淮賊萬餘人獲戰船一百二隻

末帝乾元三年五月乙巳天雄軍節度使楊師厚及

劉守奇率魏博邢洛徐兗鄆滑之衆十萬討鎮州庚戌營於鎮之南門外壬子晉將史達瑋自趙州領騎五百人入於鎮州師厚知其有備自九月移軍於下博劉守奇以一軍自貝州掠冀州衡水阜城陷下博師厚自弓高渡御河迫滄州張萬進懼送款于師厚師厚表請以萬進爲青州節度使以劉守奇爲滄州節度使

七月晉王率師自黃澤嶺東下寇邢洛魏博節度使楊師厚軍於漳水之東晉將曹進金來奔晉軍遂退貞明元年四月邠州留後李保衡以城歸順是月鳳

翔李茂貞遣僞署涇州節度使劉知俊率師攻邠州以李保衡歸順故也自是凡攻圍十四日節度使霍彥威諸軍都指揮使黃貴堅等捍寇會救軍至岐人乃還

六月庚寅晉王入魏州以賀德倫爲大同軍節度使舉族遷於晉陽是月晉人陷德州秋七月又陷澶州刺史王彥章棄城來奔是月劉鄩自洹水潛師繇黃澤路西趣晉陽至樂平縣值霖雨積旬乃班師還次宗城遂至貝州軍於堂邑遇晉軍轉戰數十里晉軍稍還

二年二月命許州節度使王檀河陽節度使謝彥章
鄭州防禦使王彥章率師自陰地關抵晉陽悉攻其
壘不克而旋

三月劉鄩率師與晉王大戰於元城鄩軍敗績先是
鄩軍駐於莘帝以河朔危急師老於外餉饋不克遣
使賜鄩詔微以責讓鄩奏以寇勢方盛未可輕動帝
又問鄩決勝之策鄩奏曰人給糧十斛盡則破敵帝
不悅復遣促戰鄩召諸將會議諸將皆欲戰鄩默然
一日鄩引軍攻鎮定之營彼衆大駭上下騰亂俘斬
甚衆時帝遣偏將楊延直領軍萬餘人屯檀州以應

鄩既而晉王詐言歸大原劉鄩以爲信是月詔楊延
直會於魏城下鄩自莘率軍亦至與延直會既而晉
王自貝州至鄩引軍漸退至故元城西與晉人決戰
大爲所敗追至河上軍士赴水歿者甚衆鄩自黎陽
濟河奔滑州

四年二月遣將謝彥章帥衆數百迫楊劉城甲子晉
王來援楊劉彥之軍不利而退

八月晉王率師次楊劉口遂軍於麻家渡北面招討
使賀瓌以兵屯濮州北行臺村對壘百餘日晉王以
輕騎來覘許州節度使謝彥章發伏兵掩擊圍之數

重會救軍至僅以身免

十二月庚子朔晉王領軍迫行臺寨十里距碁結營而止二十二日晉王次臨濮賀瓌王彥章自行臺寨軍躡之二十四日至胡柳陂晉王領軍出戰瓌軍已成列晉王以騎突之王彥章一軍先敗彥章走濮陽晉人輜重在陳西瓌之領軍薄之晉人大奔自相陷籍歿者不可勝計晉大將軍周德威歿於陣瓌軍登七山列陣於山之下晉王復領軍來戰瓌軍遂敗翼日晉人攻濮陽陷之京師戒嚴

五年春正月晉人城德勝夾河爲柵

四月賀瓌攻德勝南城以朦幢戰艦橫於河以扼津濟之路晉人斷其朦幢濟軍以援南城瓌等退軍十二月戊戌晉王領軍迫河南寨王瓚率師禦之獲晉將石家才旣而瓚軍不利瓚退保楊村寨

六年六月遣兗州節度使溫昭圖莊宅使段凝領軍攻同州先是河中朱友謙襲陷同州節度使程全暉單騎奔京師友謙以其子令德爲同州留後表求節旄不允旣而帝慮友謙怨望遂命兼鎮同州制命將下而友謙已叛遣使求援於晉故命將討之九月庚寅以供奉官郎公遠克契丹歡好使晉王遣都將李

嗣昭李存審王建及率師來援同州戰於城下我師
敗績諸將以餘衆退保華州

龍德元年春正月戴思遠率師襲魏州時晉方攻鎮
州故思遠乘虛以襲之陷城安而還遂急攻德勝北
城晉將李存審極力拒守

二月晉王以兵至思遠收軍而退復保楊村

八月段凝張朗攻衛州下之獲刺史李存儒以獻戴
思遠又下淇門共城新鄉等三縣自是澶州之西湘
州之南皆爲梁有晉人失軍儲三分之一焉

三年五月以滑州節度使王彥章爲北面行營招討

使辛酉王彥章率舟師自村寨浮河而下斷德勝之
浮梁攻南城下之殺數千人唐帝棄德勝之北城併
軍保楊劉已巳王彥章圍楊劉城

六月乙亥唐帝引軍援楊劉潛軍至博州築壘於河
東岸戊子王彥章杜晏球率兵急攻博州之新壘不
克遂退保于鄒口

七月丁未唐帝引軍沿河而南王彥章棄鄒口復至
楊劉己未自楊劉援營退保楊村寨

八月以段凝代王彥章爲北面行營招討使戊子段
凝營於王村引軍自高陵渡河略臨河而還薰璋攻

澤州下之庚寅命滑州節度使王彦章率兵屯守鄆
之東境九月戊辰彦章以衆渡汶與唐軍於遮坊鎮
彦章軍不利退保中都

册府元龜

册府元龜

